

V C.
4181





Bedenck: Predigtein

Die I. gehalten zu Leipzig/ am 25. Martii 1631.

Beÿ dem Convent der hochlöblichsten
Evangelischen Chur: Fürsten vnd Stände/ am
Fest der empfangnuß Christi/ auß Luca I. vñ. 26.
biß auff den 39. versicul.

Die II. Von der zerstörung Jerusalem/ Luca XIX.

vñ. 41. & seqq. Zu mitleidlicher gedächtnuß/ der zerstö-
rung der vhralten/ löblichen/ Evangelischen/ Christlichen

Statt Magdeburg.

Gehalten in der Stadt vnd Vestung Cassel/ den 1. Augusti 1631.

Die III. Auß dem Lobgesang Deborah vnd Baraks / Judic.
cap. V. vñ. 1. & seqq. Zur gedächtnuß des herrlichen Siegs/ so GOTT
den Evangelischen wider die Tyrannische Papiſten/ bey Leipzig am
7. tag Septembr. 1631. glücklich verliehen.

Alle drey in hochansehnlichen/ volkreichen versamlungen
gehalten/ vnd auff begeren zu papier gebracht/

Durch

THEOPHILUM Newbergern.

TOBIAE XII. vñ. 7.

Gutes werck sol man herlich preisen vnd offenbaren.



Getruckt zu Cassel/ durch Johaſſ Saurſn/ im Jahr/

M. DC. XXXII.

Handwritten text at the top of the page, likely a title or header.

Large, stylized handwritten text, possibly a title or a significant heading.

Several lines of handwritten text in a cursive script, likely the main body of the document.

Handwritten text, possibly a date or a specific reference.

Handwritten text, possibly a signature or a specific name.

Handwritten text, possibly a concluding paragraph or a signature block.

BIBLIOTHECA
PONICKAVIANA

UNIVERSITÄTS-BIBLIOTHEK
HALLE
(SAALE)

Handwritten text in a narrow column on the right edge of the page, possibly a marginal note or a continuation of text from the adjacent page.

Dem Durchleuchtigen Hochgebornen Für-
sten vnd Herrn/

Herz Wilhelmen Landgraffen zu Hes-
sen/ Graffen zu Katzenelnbogen/ Dieß/ Ziegenham vnd
Nidda/ıc. der Königl. Würden auß Schweden in den Reimischen
Kränzen vñ Oberlanden hoch: wolverordneten GENERALN, &c.
Meinem gnedigen Fürsten vnd Herrn / ıc.

Gottes Gnad/ Segen/ Hülff vnd Schutz zuvor.

Durchleuchtiger/ Hochgeborner
Gnediger Fürst vnd Herr/ Groß sind die
werck des Herrn/ wer ihr achtet/ der hat ei-
tel lust daran/ was er ordnet/ das ist löblich
vnd herrlich/ vñ seine gerechtigkeit bleibet ewiglich/ spricht
David Psal. iii. v. 2. In der Herz ist gerecht/ vnd alle sei-
ne gericht sind recht/ Psal. 119. 137.

Gottes werck vnd gerechtes gericht ist bißher gewesen
vber vnser liebes Vatterland/ vnd Evangelische Kirchen/
daß er sie vmb ihrer schweren sünden willen hart heimges-
ucht vñ gezüchtiget/ davon wir alle sagen müssen: Herz/
Es ist vns gut/ daß du vns gedemütiget hast/ Psal. 119. 71.

Gottes werck aber hinwiderumb ist es/ daß nach lang
außgestandenem schwerem Trangsals die hochlöblichste
Evangelische Schur: Fürsten vnd Stände/ als welchen
Gott auch das schwert gegeben/ vñ sie zu Obrikeiten ge-

A ij setz

setzt hat / die Ihrige gebürlich zubeschützen / im verschiede-
nen Februario vnd Martio des 1631. Jahrs zu Leipzig
sich versamlet / vnd beschlossen / mit Gottes hülfte der all-
zu vnbillichen Tyrannen / vnleidlichen obermuhts / vnd
vnmenschlichen Lands verheerungē der Päpffischen Ko-
te / sich dormal eins zu entschütten / nicht zwar / daß im ge-
ringsten etwas gegen Kayf. May. als bey welcher von ge-
dachter hochansehnlicher versammlung / Schutz / wider die
Lands verderber / so sich Z. N. namens mißbrauchen / al-
lerdemütigst vnd beweglichst ist gesucht worden / solte an-
gefangen werden / sondern allein dem vnbesugten / vn-
nachlässigen / vnd den hochlöblichen Reichs Fürsten / ja
gankzer teutscher Nation gantz schimpfflichen trotzen / ty-
rannisiren / vnd gewaltthätigkeiten / deren / so sich die-
ser gelegenheit zu ihrer bereichung vnd mißföhlung ge-
brauchen / nach erlaubnuß Göttlicher / weltlicher vnd na-
türlicher Rechten zubegegnen. Derowegen auch / was
hierin von den feinden geschrieben ist / nit von ihrer Key-
serl. M. sondern von gedachten Reichs vnd Lands verder-
bern / vnd anstiftern der grausamen verwüstungen vnd
verfolgungen / gemeinet ist.

Aber auch Gottes werck / vnd ein schreckliches gerichte
Gottes istes / dz die alte löbliche Statt Magdeburg bald
darauff so erbärmlich verwüstet / vñ zerstöret worden / des-
sen der Allerhöchste Gott dann angemelte Statt seine

zwar

zwar verborgene/ aber doch heilige vñ gerechte vrsachē gehabt/ aber auch ohne zweiffel es also geschickt hat/ dz eben durch deroselben blutstärkung vnd verherung/ das maß der Päpstischen Tyranney vnd vngerechtigkeit erfüllet/ vnd darauff den Tyrannen ihr lohn auch gegeben würde.

Massen es freylich auch Gottes werck ist/ daß der tapffere held Königl. M. in Schweden heraus kommen/ mit Churf. Durchleuchtigkeit zu Sachsen de Vaterland vnd Evangelischen Kirchen zum besten sich conjungiret, vnd darauff durch Gottes hüffe einen so herrlichen wunderbaren vnd grossen Sieg wider die Päpstische Lands verheerer erlangt hat/ dergleichen in hundert vnd mehr Jahren nit erhöret worden. Da müssen ja alle menschen sagen/ dz hat Gott gethan/ vñ mercken/ dz es Gottes werck sey/ des frewen sich billich alle gerechten/ trawē auff den lieben Gott/ vñ rühmen alle frome hertzen/ Ps. 64. 10.

Wann dan billich/ daß solche wercke Gottes bey meniglich außgebreitet/ vñ der selben ein gedachtnuß gestiftet werde/ als hab ich diese drey Predigten vmb des willen auff begeren vnd ersuchen/ endlich zu Papier bracht/ der guten hoffnung/ sie werden etwa fromen hertzen zu mehrerer erbarung gereichen.

Vnd demnach E. S. G. mit bisshero empor geschwebter Tragsal auch zimlich hart vnd für andern gedrückt/ vnd noch in dem/ so dieselbe/ wiewol doch nit ohne anseh-

tung übrig behalten / auff's eusserst außgefogen / vnd ge-
 ängtiget / dannenher auch durch die höchstenothe gedrun-
 gen worden / die durch Gott / menschliche Rechte / vnd die
 natur erlaubte mittel Ihro vñ der Ihrigen verthediung
 wider obgedachte Lands verderber an die hand zunemen /
 vñ sich also deß von den Evangelische gemachten Schlus-
 ses / geschener Conjunction, vnd von Gott newlich
 verliehenen Siegs von hertzen zuerfrewen / vnd zu ge-
 brauchen / Als hab ich mit vnterlassen können / solche ge-
 dächtnuß Predigten dessen alles / E. F. G. auch zu bezei-
 gung meiner pflichtschuldigen Devotion vnderthänig zu
 dediciren, mit demütiger bitte / dieselbe in Gnaden auff-
 zunehmen / vnd im besten zuversiehen.

Der Allmächtige Gott / der allein wonder thut / er-
 halte / stärke / geleite / vnd beschütze E. F. G. sampte allen
 dero hochgeliebten Ihrigen / vnd ganzem volck / vñ gebe
 dz E. F. G. den edlen lieben frieden erlangen / durch Gött-
 lichen bestand denselben erhalten / vnd bey langem Leben
 vnd guter Gesundheit / Ihro / der hochgeliebten Ihrigen /
 vnd dero Lande vnd leuten wolfsahrt sehen mögen / Amen /
 Amen. Datum Cassel 19. Septembr. Anno 1631.

E. F. G.

Vnderthäniger Diener am
 wort Gottes /

THEOPHILUS Newberger.

Die

Die Erste Christliche

Gedenck : Predigt / zur zeit des Con-
vents / der Evangelischen Chur : Fürsten vnd Stände
zu Leipzig / in ansehnlicher versammlung / am 25. tag
Martii 1631. daselbsten gehalten.

Von der empfangnuß vnser Erlösers Jesu Christi / wie
dieselbe bey dem Evangelisten Luca im ersten Capitel / vom
26. versicul an bis auff den 39. beschrieben wird.

Eingang.

Undlich groß ist das Gottselige geheimnuß /
Gott ist offenbaret im fleisch / gerechtfertiget im
Geist / erschienen den Engeln / gepredigt den Heiden /
geglaubet von der welt / auffgenommen in die herz-
lichkeit / spricht S. Paulus 1. Timoch. 3. 16.

1. Timot.
3. 16.

Dieses hohe vnd grosse geheimnuß hat sich erzeuget / vnd
zu offenbaren angefangen / da der Sohn Gottes durch krafft vñ
würckung des H. Geistes im leibe der H. Jungfrauen Mariæ
empfangen worden / vnd vnser fleisch vnd blut an sich genommen
hat. Dessen wir vns dann heute mit der Christlichen Kirchen
auß dem ordentlichen Evangelio erinnern. Damit nun / in dem
der im fleisch geoffenbaretete Gott vns geprediget wird / wir im
glauben an ihn / in der liebe gegen ihn / vnd in der hoffnung auff
ihn also mögen gestärcket werden / daß auch wir dermal eins mit
vnd zu ihm auffgenommen werden in die ewige herzlichkeit / als
wollen wir vns zuvordest von herzen demütigen für der hohen
vnd heiligen Majestät Gottes / vnd ihne vmb erleuchtung vnd
krafft seines H. Geistes anruffen / mit dem gebett / welches vns
vnser Heiland Jesus Christus selbst gelehret / vnd zu beten
befohlen hat / Vnser Vatter / ic.

Heb. 2. 14

Textus,

54
 Textus, Lucæ cap. I. v. 26. usque ad 39.

Und im sechsten Mond ward der Engel Gabriel gesand von G^ott / in eine Statt in Galilea / die heist Nazareth / zu einer Jungfrawen / die vertrawet war einem manne / mit namen Joseph / vom hause David / vnd die Jungfraw hieß Maria. Vnd der Engel kam zu ihr hinein / vnd sprach: Gegrüßet seystu holdselige / der H^oEr ist mit dir / du gebenedeyte vnter den weibern. Da sie aber ihn sahe / erschrack sie vber seiner rede / vñnd gedachte / welch ein gruß ist das? Vnd der Engel sprach zu ihr: Fürchte dich nicht / Maria: Du hast gnade bey G^ott funden. Siehe / du wirst schwanger werden im leibe / vñ einen Sohn geben / des namen soltu Jesus heissen. Der wird groß / vnd ein sohn des Höchsten genemmet werden: Vnd Gott der H^oEr wird ihm den stul seines vatters David geben: Vnd er wird ein König seyn vber das hauß Jacob ewiglich / vñ seines Königreichs wird kein ende seyn. Da sprach Maria zu de Engel: Wie sol das zugehen? Siemal ich von keinem manne weiß. Der Engel antwortet / vñ sprach zu ihr: Der H. Geist wird vber dich kommen / vnd die krafft des Höchsten wird dich vberschatten. Darumb auch das heilige / das von dir geboren wird / wird Gottes sohn genemmet werden. Vnd siehe / Elisabeth / deine gescreunde / ist auch

schwän-

schwanger mit einem sohn / in ihrem alter / vñ gehet jetzt
im sechsten mond / die im geschrey ist / dz sie vnfruchtbar
sey: Dann bey Gott ist kein ding vnmöglich. Maria a-
ber sprach: Siehe / ich bin des Herren magd / mir gesche-
he wie du gesaget hast. Vnd der Engel schied von ihr.

Auflegung.



In sonderliches vñ wunderbares werck
vnd wolthat Gottes war es / das Gott den
einzelnen Mosen in Egypten sandte / sein armes
vnd hart bedrangtes volck Israel auß ihrer
schweren dienstbarkeit zuerlösen / vnd auß zu-
führen. Wassen dann auch Moses dem tyrannen Pharaoni ge-
trost vnter augen gangen / den befehl Gottes ihm angekündiget /
durch Gottes finger vnd bestand ihm wegen seiner halbstar-
rigkeit manche schwere plage zugefüget / das volck Is-
rael auß-
geführt / den Pharaon mit desselben gangem heer gleichsamb
nach sich hiß in die tieffe des roten meers gezogen / allda die E-
gyptier zu grunde gangen / das volck Gottes aber herrlich ist er-
löset worden / wiedann solche wolthat hernach von den heiligen
inmer höchlich ist gerühmet worden / wie in den Propheten / Psal-
men / vnd sonst hin vnd wider zu sehen ist.

Exod. 3.
10.

Exod. 15.
Psaln.
77.
105.
106.

Aber noch viel ein grösseres vnd wunderbarlicheres werck
vnd wolthat Gottes ist das / das er seinen einigen allerliebsten
sohn / den Glantz seiner herrlichkeit / vnd das Ebenbild seines we-
sens in der letzten zeit zu vns in die welt gesand / das er vns von
der Tyranny des Satans vnd der dienstbarkeit der sünden / ja
von der ewigen verdammuß erlösete. Da dan der gesunde zu den
franken / der erlöser zu den gefangenen / der weg zu den Irrenden /

1. Joh. 3.
Esaia 49.
Genes. 3.
Heb. 2. 14

Galat. 4.

Exod. 3.

Esa. 64. 1.

Psal. 14. 7.

das heil zu den verderbten / das leben zu den todten kommen. Der ist getrost dem höllischen Pharaon vnter außgegangen / hat sein werck zerstöret / ihn den raub genommen / den kopff zertretten / vnd das arme verlorne menschliche geschlecht erlöset: Vñ hat also durch seinen todt die macht genommen / dem der des todes gewalt hatte / das ist / dem Teuffel / vñ erlöset die / so durch forcht des todes im ganzen leben knechte seyn mußten. Vnd eben vmb des willen / hat er / der Sohn Gottes / da die zeit erfüllet war / wollen vnser armes fleisch vnd blut an sich nehmen / damit er für vns leiden / vnd an vnser statt bezahlen köndte. Ist wol ein hohes vnd fürtreffliches geheimnuß / welches keine menschliche zunge außsprechen kan: Mysterium singulariter mirabile & mirabiliter singulare: Welches wir billich auch zu dieser zeit / vñ bey gegenwertigem betrübten zustande mit fleiß beherzigen. Dann / was war es für zeit / da der Herr Moser in Egypten sandte? War nicht das volck Gottes erbärmlich betrauet / vnd ihre ziegel arbeit gedoppelt? Was war für ein zustand des volcks Gottes / da Christus in die welt kam? War es nicht vnder dem Joch der heiden / vnder welchem die frommen herzlich seuffteten / vnd auff den trost Israels warteten. Was jehet nun für zeiten seyen / in welche wir gerathen / ist leider / mehr als zu viel am tage / wolten nur Gott / daß wir es doch alle besser zu herpen nemen / vnd vns mit rechtschaffener glaubiger Busfertigkeit zu Gott wenden / vnd mit dem volck Gottes ruffeten: Ach daß du die Himmel zerrissest / vnd führest herab / daß die berge für dir zerfließen / daß dein name kundt würde vnder deine feinden / durch die wunder die du thust / der man sich nicht versühet: Ach daß die hälffte auß Zion käme / vnd der Herr sein gefangen volck erlösete / so würde Jacob frölich seyn / vnd Israel sich freuen. Auff daß wir dann im vertrauen auff Gott gestärcket / vnd zu rechtschaffener liebe gegen ihn / vnd wahrer busfertigkeit erwecket werden / wollen wir das verlesene ordentliche Evangelium in der forcht des

HERR

Hören fürnehmen / vnd weil es an nachdencklichen Worten
vnd Lehren sehr reich ist / nur so viel in dieser Kürze wird möglich
seyn / betrachten:

I. Die Botschafft zu Maria.

II. Das Gespräch des Engels mit Maria / über
dem hohen Geheimniß der Empfängniß Christi.

Gott gebe Gnade / daß es zu seiner Ehre / vnd vnser aller auf-
erbarung vnd seligkeit gereiche / Amen.

Vom Ersten.

Das werck der Menschwerdung Christi ein
wunderbares Geheimniß sey / gebe auch alle Umstän-
de der Botschafft / dadurch dieselbe angekündigt
worden / gnugsamb zu erkennen / wann man nemlich
ansieht / Einmahl / Von wein diese Botschafft außgesand
worden. Nemlich / von Gott. Wir Menschen seind von Natur
dermassen verderbt / vnd so gar blind / daß wir vnser eigen elend
von vns selbst nicht einmahl recht erkennen / viel weniger vns
darumb bemühen / wie wir darvon erlöset werden möchten /
Gott aber hat sich vnser erbarmet / das heyl selbst vns angebot-
ten / vnd das werck der Erlösung in Christo Jesu auß Gnaden
selbst bestellet.

Welches ja traum ein offenbarliches herrliches Zeugniß ist /
seiner herrlichen väterlichen Liebe gegen vns / davon Zacharias
des H. Geistes voll / mit freuden also singet: Durch die herr-
liche Barmherzigkeit vnseres Gottes hat vns besucht der auff-
gang auß der Höhe: Auff daß er erschiene denen / die da sitzen im
finsterniß vnd schatten des Todes / vnd richte vnser füße auß
den weg des Friedens:

Es sammert Gott in ewigkelt
Vnser elend über die Massen!

Luc. I. 78.

Er dacht an seine barmhertigkeit
 Er wolt vns heiffen lassen/
 Er wandte zu vns das Vatter hertz/
 Es war bey ihm fürwar kein scherz/
 Er lieh seyn bestes kosten.

Er sprach zu seinem lieben sohn/
 Die zeit ist hie zur barmen:
 Fahr hin meins hertzens werthe kron/
 Vnd sey das heyl der armen:
 Vnd hilf ihu auß der sünden noth/
 Erwürg für sie den bittern todt/
 Vnd laß sie mit dir leben.

Solche liebe vnser hümlichen vatters gegen vns / laß vns doch erkennen / ihu wider lieben / als der vns erst geliebet hat / vnd seine in Jesu Christo vns angebotene vnd erzeigete wolthat mit wahrem glauben / vnnnd hertzlicher danckbarkeit also annehmen / damit wir vns derselben in vnsern höchsten nöhten / ja im tode selbst trösten / vnd ewig seelig werden mögen.

1. Johan.
4. 19.

II.

Dasß das geheimnuß der empfangnuß Christi groß vnd wunderbar sey / erscheinet Fürs Andere auß dem Votten / der sie angekündigt hat. Das war ein heiliger ENGEL Gottes / welcher im Text GABRIEL genennet wird: Nicht eben / daß die H. Engel solche eigene namen haben / sondern sie werden etwa in der schrift mit namen genennet / welche ihre verrichtungen / ampt oder gestalt bedeuten. Also wird hie der Engel genennet / Gabriel / das ist / Gottes Krafft / dieweil er allhier ankündigen mußte die krafft des Höchsten / welche Mariam überschatten sollte. Anders wo / wird ein Engel / ja der sohn Gottes / genennet Michael / das ist / der schlagende oder kämpfende Gott / dieweil er mit dem Fürstendes Königreichs in Persenland / vnd auch mit dem Trachen vnd seinen Engeln gestritten / vnd überwunden. Ein anderer Engel wird genennet

Luc. 1. 35.

Dan. 10.

13.

Apoc. 12.

7.

Raphas

Raphael / der arzt **Gott** / weil derselbe des Tobia arzt
vnd Geleitmann gewesen. Andere Engel werden genennet
Seraphim / das ist / Brenner / weil derselb̄ einer eine glüens-
de kohle genommen / vnd damit des Propheten Esaiā lippen ge-
rühret hat. Andere werden genēet Cherubim von ihrer gestalt /
in welcher sie als Jünglinge anzusehen gewesen.

Tob. 5.

Esaia 6.

Genes. 3.

Exod. 25.

1. Reg. 6.

Dann Gott durch eine **H.** Engel vom Himm̄l die empfang-
nuß vñ menschwerdung Jesu Christi vnser Erlösers hat wollt
auff erden verkündigen lassen / was hat er vns anders damit an-
deuten wollen / als **Einmal** / welch ein hohes heiliges himli-
sches Geheimnuß solches sey / zu dessen ankündigung die **H.**
Geister vnd himlische Boten Gottes sich müssen gebrauchen
lassen? **Dann auch** / wie herzlich vnd väterlich er vns liebe /
vnd vnser heils begierig sey. **Wie nicht weniger** / welch ein
grosser vnd fürnehmer **Herz** vnser Heiland sey / dem die **H.** En-
gel / wie in diesem stück / also auch sonst allezeit auffwarten vnd
dienen müssen / welches sie dann mit sonderlicher freude ge-
than / als die da gelüftet solch geheimnuß anzuschawen.

1. Pet. 1. 12.

Heb. 1. 14

Genes. 18.

Genes. 19.

Genes. 32.

Jof. 5.

Judic. 13.

1. Reg. 19.

2. Reg. 2.

Dan. 9. 10

Tob. 5.

Luc. 1.

Actor. 10.

Actor. 12.

Wir erkennen auch hierauf / was das ampt sey / der **H.**
Engel Gottes gegen die auferwehltē glaubige / daß sie nemlich
sind dienstbare Geister / ausgesand zum dienst / umb deren wil-
len / die die seligkeit ererben sollen. Also wird der Engel allhie ge-
sant zu Maria / ihr eine sonderbare gnade vnd freude anzukün-
digen; Also haben die liebe Engel sich etwa finden lassen bey **A-**
braham / **Loth** / **Jacob** / **Josua** / **Manoa** vñ seinem weibe / **Eli-**
Elisa / **Daniel** / **Tobia** / **Zacharia** / den Jüngern Christi / bey
Cornelio vnd andern. Vnd ist keines wegē zu zweiffeln / daß
auch noch solche heilige himlische wächter / die liebe Engel sich
finden lassen / bey denen / die Gott fürchten vnd ehren / sie zu schüt-
zen vnd zu trösten. **Wassē David** rühmet vnd spricht: **Der**

B iij Engel

Pfal. 34. 8.

1. Corint.

11. v. 2.

& 10.

Genes.

Exod. 2.

1. Reg.

Pfal. 91. 11

III.

Joh. 7. 52.

Joh. 1. 46.

Engel des Herren lagert sich umb die her / so ihn fürchten / vnd hilff suchen auß. Allen / wann wir solches schutzes vn bestands der H. Engel vns getrostien wollen / müssen wir auch ordentlich vnd dem willen Gottes gemess leben. Darumb auch Paulus den Corinthern befielt / die weis / so er ihnen gegeben hatte / zu halten / vnd alles gebürlich zugehen zulassen / vnder andern vrsachen / auch vmb der Engel willen. Dann an vnordnung vnd vnheutigem leben / haben die guten Engel keinen gefallen / sondern da finden sich viel mehr die böse geister / vnd des teuffels engel. Wer aber Gott dicnet / vnd nach vermögen seines berufes ordentlich vnd trewlich abwartet / der hat sich gewis zuversichern / daß / wie Maria / den Bethlehemitischen hirtten / vnd andern / ob erzehlten Kindern Gottes / die H. Engel auff gewartet / vnd freude vnd trost zubracht haben / also werden sie auch ihme trewlich beywohnen / vnd ihn nicht hüfflos lassen: dann der Herr hat schon seinen Engeln befohlen ober einen solchen menschen / daß sie ihn behüten auff allen seinen wegen / daß sie ihn auff den händen tragen / daß er seinen fuß nit an einen stein stoße.

Daß das werck der empfangnis Christi ein wunderbares geheimnuß sey / bezeuget Jws dritte / der ort / da dieselbe angekündiget worden vnd geschehen ist / nemblich / Nazareth in Gallilea. Galilea war verachtet: forsche vnd sihe / sagten die hochpriester vnd Phariseer / auß Galilea siehet kein Prophet auff. Nazareth war noch verächter. Was kan von Nazareth gutes kommen? sprach Nathanael. Doch hat es Gott gefallen in dem verachteten Ländlein / ja in der beschreyten Statt seinen eingebornen Sohn der welt Heiland empfangen / vnd ankündigen zu lassen. Er schickt seinen Engel nicht gen Rom / da die Keyserl. Residenz war: nicht gen Jerusalem da der hochpriesterliche Stul war: nicht gen Epheso / da der berühmte Tempel Dianæ war: nicht gen Athen / da so viel hochgelehrte

leute/

leute / vnd die weitberümpfte Schul war ; sondern in das arme elende Stättlein Nazareth in Galilea.

Also sihet vnd achtet vnser lieber Gott nicht eben auff das / was in dieser welt hoch / groß vnd ansehnlich ist / sondern viel mehr / was veracht vnd nichts ist für der welt / daß er zu nichte mache was etwas ist / auff daß sich für ihm kein fleisch rühme. Ursach dessen ist leicht zuerachen. Dann an grossen vnd fürnehmen orten wird mehren theils vnsern lieben Gottes / seines H. worts / vnd frommer leute nicht viel geachtet / sondern viel mehr die welt vnd derselben ehr vnd gut. Darumb kehrets Gott vmb / vnd achtet derselben widerumb nicht: Dann wer mich verachtet / soll wider verachtet werden / spricht Gott. Darumb wir in Göttliche sachen / vñ was zum reich Christi gehöret / vns keines weges nach hohen vñ fürnehmen örtern / Landen oder Stätten richten / noch einigerley weise an weltlichem ansehen vergaffen sollen: Dann der Herr sihet viel mehr auff das nidrige.

Wer auch begeret / daß sein Land / seine Statt / sein haus berümpft werde / der ruffe Gott an / vnd bemühe sich / daß Jesus Christus darin empfangen werde / vñ in den herzen der seinigen eine gestalt gewinne: welches geschihet durch die reine predigt des H. Evangelii / so dieselbe mit wahren glauben wird angenommen.

Wunderbar ist das Scheinnuß / Wann wir bedencken Fürs vierte die Person / zu welcher die bottschaft geschehe / die wird geneuet Maria / vñ wird ferner beschrieben / daß sie gewesen sey eine Jungfrawe / damit nemlich erfüllet würde / die weißsagung des Propheten Esai / der da spricht: Siehe eine Jungfraw ist schwanger / vñ wird einen sohn geben: Ja damit Christus ohne zuthun eines mannes / vnd also ohne sünde empfangen würde / vnd warhafftig des weibes samen were. Ober

das

1. Corint.
1. 28.1. Sam. 2.
30.

Gal. 4. 19.

IV.

Esa. 7. 14.

Gen. 3. 15.

Deut. 22.
21.

das/wird gemeldet / daß sie auch vertrauet gewesen sey einem manne mit namen Joseph. Womit Gott nit allein den Heystand bestättigen / sondern auch verhüten wollen / damit nicht/wenn Maria hernach schwanger erfunden würde/ sie nach dem gesetz Moses vom Volck zu todt gesteiniget werden möchte; Ja damit viel mehr Maria sampt dem Kinde einen pflegvatter/ vnd treuen beystand hette.

1. Sam. 7.

Luc. 1.

Lib. 1. cap.
100.

Von Joseph aber wird vermeldet/ daß er auß dem hause David gewesen/damit man nemlich wüßte/ weil die Stämme vnd Geschlechter sich nicht vermischen noch jemand vermög des gesetzes ausser seinem Stamm freyen dörfte / daß auch Maria / vnd also folgendes Christus selbst auß dem hause vnd geschlechte Davids / laut der verheißung/ so Gott dem David gethan hatte/gewesen sey. Nun war zwar damahls dz geschlecht Davids sehr auff die neige kommen / Vnd war Maria / wie sie selbst bekennet eine elende Magd: Dennoch hat es Gott gefallen / daß sie den Heyland der welt empfangen vnd geben solte. Gott schickt nicht gen Rom zu der Tochter des Keyfers Augusti/ Julia, als welche/wie C. Vell. Patern. meldet/ eben gegē die selbe zeit in den allerschändlichsten wollüsten sich welzete / vnd deswegen auch hernach ins elend verschickt worden: Dann an solchem vnflätigem leben / wie hoch auch die person sey / hat Gott keinen gefallen/ sondern erwehlet vielmehr die/ wiewol arme/ jedoch heylige/reine/ vnd keusche Jungfraw Mariam.

1. Cor. 1.
26.

Esa. 66. 2.

Womit dann eines theils / was schon zuvor angeregt worden/bestättiget wird / daß nemlich Gott der Herr nicht ansehe/ was für dieser welt gewaltig/edel/vnd hoch ist/ sondern viel mehr das da vnedel/verachtet/vnd für der welt nichts ist/wie Paulus redet: ja wie der Herr selbst spricht: Ich sehe an den elenden/vnd der zerbrochnes geistes ist/ vñ der sich fürchtet für meinem wort.

Anders

Anders theils werden wir hierdurch gestärket im glauben an Jesum Christum / das / weantlich er / vnd kein ander / der wahre versprochene Messias / vnd heylandt der welt sey / als welcher / nach der verheiffung Gottes / von einer Jungfraw / vnd auß dem geschlechte Davids herkommen / ja in welchem auch sonst alle verheiffungen Gottes ja vnd amen seind / vnd erfüllet worden / was geschrieben stehet in Mose / in den Propheten / vnd Psalmen: Darumb wir auch an ihn von herten glauben / vñ in ihm allein vnser seligkeit suchen sollen / Dannes ist doch in keinem andern heyl / es ist auch kein ander name den menschen gegeben / darin sie sollen selig werden / dann der name Jesu.

2. Cor. 1.

Luc. 24.

Actor. 4.

Es gibt vns auch dieses sonst noch eine gute Erinnerung / weil Christus von einer Jungfrawen empfangen / vnd der Engel Gottes zu einer Jungfraw gesendet worden / das wir darauff erkennen / Jesus Christus vnd seine heilige Engel lehren nirgend lieber ein / wohnen auch nirgends lieber / als bey denen / die da reines / keusches / vnd gottseliges hertzens sind / vnd demnach / ob sie schon im leiblichen ehstand / welcher eine heylige Ordnung Gottes ist / leben / dennoch geistliche Jungfrawen / das ist / heylig / vnd vnsträfflich seind: welche keines wegs dem Teuffel / der welt / oder des fleisches lasten nachhangen / sondern sich allerdings Gott ergeben / ihm zu dienen in heyligkeit / vnd gerechtigkeit / die ihm wolgefällig ist. Daher Paulus den Corinthern also zuschreibt: Ich habe euch vertrawet einem manne / das ich eine reine Jungfraw Christo zubrächte: ja Christus selbst hat sich darun für seine gemeine dahin gegeben / auff das er sie heyliget / vnd hat sie gereiniget durch das wasserbad im wort / auff das er sie ihm selbst darstellte eine gemeine / die herrlich sey / die nicht habe einen flecken oder ruckel / oder des tirtas / sondern das sie heylig sey vnd vnsträfflich. So wird dann wollen / das Jesus Christus auch bey vns wohne / die h. Engel zu vns einkehren / vnd vns schügen vnd erfreuen sollen / wird in alle wege von

2. Cor. 11.

2.

Eph. 5. 26.

E

ndhten

Jaco. 4. 8.

1. Pet. 2. 11

Jud. 5. 21.

2. Cor. 7. 1.

Job. 27. 6.

2. Cor. 1.

12.

Heb. 13.

18.

nöhten seyn / das auch wir eines heiligen unbesteckten wandels
 uns befließen / unsere hände reinigen: Unsere herzen keusch ma-
 chen: Uns von den fleischlichen lusten / welche wider die seele
 streiten / enhalten / den besteckten rock des fleisches hassen / von
 aller besteckung des fleisches vnd des Geistes unreinigen / vnd
 fortfahren mit der heiligung in der forcht Gottes. Daß ob wol
 gewis ist / daß Gott / vermög seiner verheißung / auch die sün-
 demste sänder / so sie sich bekehren / zu gnaden annimt / so ist doch
 diß fürwar eine sonderliche frewdigkeit / wann der mensch sagen
 kan mit Job: mein gewissen beisset mich mit / meines ganzen le-
 bens halben: Vnd mit Paulo: Unser rühm ist der / nemlich das
 zeugnuß vnsers gewissen / daß wir in einigkeit / vñ göttlicher
 lauterkeit gewandelt haben. Ja unser trost ist der / daß wir ein
 gut gewissen haben / vnd fleißigen vns / guten wandel zu führen
 bey allen. Darumb wir freylich alles ampt vns auch eines guten
 gewissen befließen / unnermehr auff gnade sündigen / sondern
 a. zeit vnd bey allen einen guten wandel führen sollen. Als dann
 wird Jesus Christus wohnung bey vns machen / seine H. Engel
 werden sich auch bey vns finden / vnd vns erfreuen / wieder H.
 Jungfrauen Mariae geschehen ist.

Zum Andern.

Dann es heile nun mehr folgendes der Engel
 Gabriel mit Maria ein heyliges / vnd trostreiches
 gespräch / davon wir jezund auch / aber auff's aller
 kürzeste / etwas reden wollen. Vorbey sonderlich
 zubedencken seyn wird:

I. Der Engeltliche Gruß / vnd wie der selbe Ma-
 ria vorkommen.

II. Die Proposition oder der Vortrag des En-
 gels /

gels / Vnd wie der selbe auff Maria frage vom Engel selbst erkläret vnd bestätiget worden.

Der Engelischen Gruß wird erstlich Maria befohlen sich zu freuen: Begrüßet seystu: *χαίρει*, das ist / freue dich / Sprichet der Engel / andeutend / daß er ein guter Bote sey / dessen anbringen sie sich billich von herzen zu freuen sollen.

Ursach zeigt er bald an / wann er spricht: **Du holdselige /** oder wie es eigentlich heist / *κεχαρισμένη* / **Du begnadete:** welcher nemlich für allen andern sonderliche gnade vnd ehre von Gott widerfahren / vnd zwar ohne einigen ihren verdienst / wie es der Engel drunden erkläret / sagend: du hast gnade bey Gott funden.

Weiter erkläret der Engel die ursach / vund spricht: **Der Herz ist mit dir:** welches entweder von dem gnedigen schutz vnd geleit Gottes; oder davon zu verstehen ist / daß nun mehr der Herz Messias mit ihr seyn / vnd vnter ihrem herzen werde getragen werden.

Weshwegen der Engel dann fermer sie glücklich preiset / vnd nennet sie / **Die gebenedeyete vnter den Weibern:** Als sprach er: **Siehe du bist diejenige /** welche Gott für allen andern auß gnaden gewürdiget hat / daß sie empfangen vnd zur welt geben soll / den / auß welchen bisher / als auß den einigen Trost Israelis / alle glaubigen mit verlangen gewarret haben. Wie viel gottselige Matronen haben nach vñ nach gehoffet die gnade vnd ehre zu haben / daß sie den mannen H. E. ren geben sollten / aber es ist keiner widerfahren.

Nun siehe / du bist das weib / dessen samen der schlange den kopff zertreten. Du bist die Jungfraw / welche einen Sohn / den Immanuel / geben sollte. Dessen hastu dich billich von herzen zu freuen.

Genes. 3.

Esaia 7.

Wann wir/ geliebte im Herrn / diesen Engelischen Gruss
auffs allerfleisigste zerlegen / auffss subtilste durch grübeln / ja/
so es möglich were / daß wir alle wort desselbe gleichsam in einen
diegel sehen / vnd distilliren könten / so würden wir doch nichts
darin finden/ das für ein gebet zuhalten were: wie man im Pap-
st umb ein gebet darauß gemacht hat / vnd dasselbe öffter / vnd
mit grösser andacht gebrauchet/ als das allerheiligste gebet / wel-
ches vns vnser Herr Jesus selbst gelehret hat.

Daß aber gleichwol dieser Engelische gruß durchaus für
kein gebet zuhalten sey: ist leicht zuerweisen. Dann ein gebet / wie
jederman gestehen muß/ ist nichts anders / als ein andächtiges/
glaubiges gespräch mit Gott / oder anruffung Gottes / darin
der mensch entweder etwas von Gott bittet / oder ihm für em-
pfangene wolthat dancket. Nun redet hie der Engel nicht mit
Gott / sondern mit einem armen schwachen menschen: er bittet
vmb nichts: thut auch keine danck-sagung: sondern befiehlt viel
mehr Maria: / daß sie sich freuen soll / vnd zeigtet dai bey vrsach
solcher freude an / derentwegen er ihr glück wünschet.

So ist auch keines weges zimlich / daß ein heiliger himli-
scher Engel/ ein armes / sündliches / sterbliches mensch / ja ein
weib anbeten sollte.

Mag auch gar nichts helfen/ daß die Papisten fürwenden/
wanns gleich kein gebet sey / so sey es gleichwol ein gruß / vnd
sey noch so wol allen glaubigen/ als damals dem Engel erlaube/
die heilige hochgelobte Jungfraw Mariam täglich in Gottse-
liger andacht zuzrüssen: Dann einmahl/ so folget nit/ daß wir
alles/ was etwa die Engel gethan / auch nachthun sollen.

Jud. 6. 12.

Den tapfferen Helden Gideon grüßete vor zeiten auch ein
Engel Gottes: vnd sprach: Der Herr mit dir / du streitbarer
Held. Wir lesen aber gleichwol nit / daß jemandt auß den glau-
bigen des alten testaments den Gideon nach seinem tode also ha-
be pflegen zu grüssen: Zu dem so ist Maria jehund nicht mehr

auff er

auff erden zu gegen / sondern droben im Himmel: sie höret vnsern
gruß nicht / sie antwortet vnd redet nicht mit vns / wie sie dazu
mahl den Engel gehöret vnd mit ihm geredet: vñ ist demnach ei-
ne vergebliche mühe / vnd vnnütze ja sündliche vnd abgöttische
andacht: Zu mahl weil wir keinen befehl haben / noch von Gott /
wieder Engel Gabriel / darzu gesand seind / Mariæ dergleichen
anzukündigen / sonderlich nach dem das jenige / welches der En-
gel dazumahl verkündiget hat / albereit vor längst vollbracht ist /
es were dann sach / das die Papisten gerne wolten / weil sie ohne
das an Christi verdienst kein genügen haben / das Maria ihuen
zu gefallen noch einen Messiam empfangen vnd geben sollte.

So hat auch endlich die erste Apostolische Christliche Kirch
von solcher anbetung Mariæ / vnd abgöttischem mißbrauch
deß Engelischen grusses nichts gewußt / viel weniger denselben
gebilliget. Es haben zwar einmahls hernach die Co. lyridiani
in Arabia den abgöttischen Marien dienst auffgerichtet: Der
Mariæ Kuchen geopfert vnd sie angebetet / aber solches ihr be-
ginnen ist von der Christlichen Kirchen vnd den alten Lehrern
improbirt vnd verdammet worden: wie bey dem Epiphanio mit
mehrern zulesen. Vnd sind die Marien fest erst vmb das Jahr
Christi 1273. nach vnd nach eingeführet worden. Vmb das Jahr
aber 1320. hat Pappst Johannes der 22. verordnet / das täglich
gegen abend geleutet / vnd das Ave Maria gebetet würde.

Wir meiden billich solche abgötterey / als die wir wissen /
was der Herr sagt: Du sollt anbeten Gott deinen Herrn / vnd
ihm allein dienen. Vnd ich der Herr / das ist mein name / vnd
wil meine ehre. keinem andern geben.

Marth. 4.

Esaia 47.

So wir aber jetz etwas auß diesem Engelischen gruß lernen
wollen / So laß vns nach dem exempel deß Engels einander
auch freundlich vnd herzlich grüssen: Also / das es ohne falsch
vnd heuchelei geschehe: das es nicht seyen Joabs grüsse / vñ Zu
das küsse: viel grüsse vnd wenig liebe: viel hände / wenig herzen:

E iij Da

Pfal. 5. 7.

Dader mund spricht / ich grüsse dich / das hertz aber denckt / hätte dich. Denn an solcher falschheit hat Gott einen gewel.

I. Cor. 13.

Last vns lernen einander glück wünschē / und erfreuen / wanns unserm nechsten wol gehet / vnd ihme gerne gute botschafft bringen: nicht aber einander betrüben / oder unserm nechsten sein hertz mißgönnen: Dann das ist der Christlichen liebe nicht gemess.

Heb. 13. 7.

Phil. 4. 8.

Last vns lernen der H. Maria im glauben / zucht / vnd demut nachfolgen. Das wird die beste ehre seyn / die wir ihr / oder auch andern verstorbenen Heiligen anthun können.

Gen. 27.

22.

Jud. 6. 12.

1. Sam. 10.

7.

2. Sam. 7.

2.

Matt. 25.

34.

Dann darumb seind ihre exempel auffgeschriben / das wir derselben rühmlich gedoncken / vnd ihnen nachfolgen sollen. Schawet ihr ende an / vnd folget ihrem glauben nach / spricht der Apostel. Ist irgend eine tugent / ist etwa ein lob / dem dencket nach / ja dem folget nach. Werden wir das thun / so werden auch wir des Engelischen grusses vns zutrösten haben / vnd vrsach finden vns von hertzen zu erfreuen: Wir werden auch vom Herrn länger je mehr begnadet werden: Der Herr wird mit vns seyn / wie er mit Abraham war / mit Gideon / mit Saul so lang er dem Samuel gehorchte / mit David vnd andern Heiligen. Ja wir werden seyn die gebenedeyeten des HERRN / die den segn GOTTES spüren / ja dermal eins an jedem grossen tage für aller welt die fröliche stimme / vnd den seligen gruß / nicht von einem blossen Engel / sondern von Jesu Christo selbst hören werden: Kommet her ihr gebenedeyete meines Vatters / ererbet das reich / das euch von anbegin der welt bereitet ist. Da hingegen die jenige / so sich des glaubens vnd der frömmigkeit nicht befließen haben / nichts helfen wirdt / Wann sie gleich noch so viel / vnd auß allen ihren kräften Ave Maria geruffen hetten.

Wie kompt aber der H. Maria dieser Engelische gruß vore

Der

Der tert sagt: **Ersülich: Sie sey erschrocken.** Worauf erscheinet / Das sie des zusprechens von manns volck / dergleichen gestalt der Engel ohne zweiffel gehabt / nicht gewohnt gewesen.

Darnach habe sie gedacht / **Welchein gruß ist das?** Dañ sie erkandte ihr elend / vnd mirdigkeit / Derwegen ihr frembd vorkam / mit solchen hohen titeln / vnd vndersehener glückwünschung begrüßet zu werden. Verläßt vns allen ein trefflich exempel der zucht / schamhaftigkeit vnd demuth / deren wir vns alle / so wol manns als weibs personen in vnserm gangen leben befließen sollen.

Als der Engel nun sihet / daß Maria erschrocken ist / wiler sie nicht länger auffhalten / sondern bringe die sache / daruñ er kommen ist / vor / also / daß er zuvorderst ihr die forcht benimpt durch einen tröstlichen eingang / in dem er spricht: **Fürchte dich nit Maria: Besach: Dañ du hast gnade bey Gott funden.** Erschrecke nicht / entsetze dich nicht / liebe Maria: Nicht zorn / sondern gnade verkündige ich dir. Du hast einen gnedigen Gott / nicht nur des bundes halben zu deiner seligkeit / sondern auch noch vmb einer andern sonderbaren hohen wolthat vnd ehre willen / deren dich Gott auß gnaden gewürdiget hat / vnd vmb welcher willen ich ich und zu dir gesandt bin.

Schämen solten sich billich die werck heiligen / so offit sie diese wort des Engels zu Maria hören oder lesen: **du hast gnade bey Gott funden.** Merckt wol / nicht verdienet / sondern funden. Dann was man findet / das hat man nicht verdienet. Hat nun die heilige hochgelobte Jungfrau Maria / die sie doch vber alle heiligen erheben / Gottes gnade nicht verdienet / sondern funden / welch ein vermessenheit ist es dann / daß die Kloster Jungfrauen sampt ihren brüderñ / Gottes gnade vnd den himmel selbst / nicht nur für sich / sondern auch für andere / mit ihren

vermeinen

- vermeinten guten wercken; zu verdienen / sich außgeben dürffend
- Genes. 6. Wird doch auch von dem H. Noah/der ein frommer mañ war/
ohne wandel/vñ führete ein Göttlich leben/gesagt: er hab gnade
für dem Herren funden: Dann wie Paulus lehret / so hat
- Heb. 11. 7. Noah nit mit seinen wercken verdienet / sondern durch den glau-
ben ererbet die gerechtigkeit/die durch den glauben kompt. Vnd
- Eph. 2. 8. zun Ephesern schreibt Paulus: Auß gnaden sey t/ ihr selig wor-
den durch den glauben / vnd dasselbig nicht auß euch / Gottes
gabe ist es / nicht auß den wercken / auffdass sich nicht jemand
rühme. Vnd nicht vmb der wercke willen der gerechtigkeit / die
Tit. 3. 5. wir gethan hettent/ sondern nach seiner barmherzigkeit / macht er
vns selig / durch das badt der wider geburt / vnd erneuerung des
H. Geistes welchen er auß gegossen hat ober vns reichlich / durch
Jesum Christ vnsern Heiland / auffdass wir durch desselbigen
gnade gerecht / vnd erben seyen des ewigen lebens / nach der hoff-
nung / das ist se gewißlich war.

In dem auch der Engel allein die gnade Gottes zur vrsach
anzeucht / darumb Maria getrost seyn / vnd sich nicht fürchten
soll; lehret er vns damit / dass das einzige fundament, vnd die
quelle alles trostes sey die gnade Gottes / als auß welcher alles
ander / was vns erquicket vnd trösten kan / her fließt.

- Wo Gottes zorn vnd vngnade ist / da ist eitel jammer/
fluch vñ vermaledeyung. Wo aber Gottes gnade ist / da ist alles
gutes / eitel heil vnd segen / es gehe vns auch sonst wie es wolle; ja
auch alles creuz vnd widerwertigkeit muß vns ein segen seyn.
- Pfal. 63. 4. Die gütedes Herren ist besser dann leben. Drum spricht Chris-
2. Cor. 12. tus zu Paulo: Last dir an meiner gnade gnügen; Dann meine
krafte ist in den schwachen mächtig. Vnd wol dem menschen/
welcher der gnade Gottes versichert ist! Wo für hat sich der zu
fürchten? für wem solte ihm grauen! Wann ich nur dich habe
Pfal. 73. Herr/ so frag ich nichts nach himmel vnd erden/ wann mir gleich
leib vnd seel verschmachtet / so bistu doch Gott allezeit meines

hernen

Pfal. 4.

Pfal. 103.

herrsens trost vñ mein theil. Ja du Herr erstreuest mein herb/ ob
gleich andere viel wein vnd korn haben. Wer aber solcher gnade
Gottes versichert seyn wil / der muß durch wahren glauben vnd
herzliche büßfertigkeit sich stättig an Gott halten. Dann die
gnade des Herren wehret von ewigkeit zu ewigkeit vber die so zu
fürchten / vnd seine gerechtigkeit auff Kindes Kind / bey denen die
seinen bund halten / vnd gedencken an sein gebott / daß sie dar-
nach thun.

Nachdem nun der Engel Mariam getröstet / thut er den
vortrag seiner sache / erkläret auch vnd bestätiget denselben mit
vielen herrlichen vnd nachdencklichen Worten. Weil es aber un-
möglich ist in solcher kürze der zeit alles außzuführen / wollen
wir nur die Summ an der selben anzeigen / also / daß wir zugleich
darauß von der person Christi / vnd seinem ampt etlicher massen
vnd so viel der Text gelegenheit gibt / zu auffmunterung vnsers
glaubens / bekandnuß thun. Es zeigt aber der Engel der Jung-
frauen Mariæ an / daß sie schwanger werden / vnd einen sohn
geben soll / dessen namen sie sol Jesus heissen / der werde groß
vnd ein sohn des Höchsten genect werden. Vnd Gott der Herr
werde ihm den stul seines vatters Davids geben / vnd er werde
ein König seyn vber das haus Jacob ewiglich / vnd seines Kö-
nigreichs werde kein ende seyn. Als Maria mit zwar auß zweif-
fel / sondern vmb vnderichts willen fraget / wie das zugehen sol /
sintemahl sie von keinem manne wisse? So erkläret erstlich der
Engel wie es zugehen werde / vnd spricht: der heilige Geist wird
vber dich kommen / vnd die krafft des Höchsten wird dich vber-
schatten / darumb auch das heilige / das von dir geboren wird /
wird Gottes sohn genect werden. Darnach bestätiget er; erst-
lich mit dem exempel ihrer gefreundin / der alten Elisabet / wel-
che / ob sie schon biß in ihr hohes alter vnfruchtbar gewesen / den-
noch nunm. hr schwanger sey mit einẽ Sohn / vnd gehe im sech-
sten monat. Zum andern mit der allmacht Gottes; sintemal ja

D bey

ben **G**ott kein ding unmöglich sey. Vorauff sich denn auch Maria zufrieden gibt / vnd spricht: Siehe ich bin des Herren magd / mihr geschehe wie du gesagt hast. Vnd der Engel schied von ihr.

Auff welchem vortrag des Engels wir vns / wie droben gemeldet / erinnern / Erstlich / der Person Christi / vnd in derselben so wol seiner menschlichen / als Göttlichen natur. Der menschlichen / in dem zu Maria gesagt wird: Sie werde schwanger werden im leibe / ja sie werde den Sohn gebären: wodurch dann klärllich angezeigt wird / daß der Sohn Gottes auß dem leibe der Jungfraw Maria wahre menschliche natur / vnd unser fleisch vñ blut annemen / vñ also wahrer mensch / der same Abrahams / der same Davids / des weibs samen / des menschen Sohn / vnd vns in allem gleich seyn werde / doch außgenommen die sünde.

Dann daß eben dieser mensch heilig / vnschuldig / vnbefleckt / vnd von den sündern abgefondert seyn werde / gibt der Engel daz mit zu verstehen / in dem er lehret / daß Christus nicht von dem willen / vnd mit zuthun eines mannes / sondern vom H. Geist / vnd durch die krafft des Allerhöchsten sol empfangen werden. Welche empfengnuß vom H. Geist in sich begreiff / erstlich die formirung des Leibes Christi in dem leibe der Jungfrawen Maria: Zum andern die heiligung des leibes Christi / damit derselbe ohne sünde were. Zum dritten die persönliche vereinigung der menschlichen vnd Göttlichen natur / daß ein Christus sey / Gott vnd Mensch / in einer unzertrenlichen person. Vnd hat Christus heilig vnd ohne sünde empfangen werden wollen / wie er dan im Text das heilige geneuet wird / damit er vns / die wir in sünden empfangen vnd geboren seind / heiligen / vnd sich zur bezahlung für unsere sünde dargeben könde / vnd ihm nicht noch were zu erst für eigene sünde opffer zuthun.

Seiner Göttlichen natur / erinnern wir vns auß dem / daß

der Enc

Pfal. 51.

der Engel ihn nennt den Sohn des allerhöchsten / Item Gottes Sohn / wie dann auch Paulus in solchem verstande spricht: Christus sey geboren von dem samen Davids nach dem fleisch / vnd erweist kräftiglich ein Sohn Gottes nach dem Geist. Ja er sey Gott ober alles hochgetödt in ewigkeit. Das aber gleichwol nicht zweien Christi / sondern ein Christus / ja eine unzertrenliche Person sey / so auß beyden naturen bestehet / erscheinet auß dem / daß der Sohn Maria auch der Sohn Gottes / vnd des Allerhöchsten : Vnd der Sohn Gottes hinwiderumb der Sohn Maria genennet wird. Auß welcher persönlichen / vnzertrenlichen vereinigunge eine solche gemeinschafft der eigenschafft in dieser person erfolgt / daß nit nur den worten nach / sondern im werck selbst / in der that vnd warheit dem Sohn des menschen / oder dem menschen Christo zustehet / vnd auch von ihm gesagt werden kan / alles was dem Sohn Gottes oder Gott selbst zustehet / oder von ihm gesagt wird: Vnd hinwiderumb / daß dem Sohn Gottes / oder Christo Gott in der that vnd warheit zustehet vñ von ihm gesagt werden kan / alles / was dem Sohn Maria oder Christo dem menschen zustehet / vñ von ihm gesagt wird. Daß man demnach mit warheit sagen kan: Der mensch Christus Jesus / sey ewig / allmächtig / allwissend / allgegenwertig: Vñ hinwiderumb der Sohn Gottes oder Christus Gott hat für vns gelittē / hat seine kirch erkauft mit seine blut: ist getödt nach dem fleisch: ja der Herr der herlichkeit ist gecreuziget. Dañ ja nicht ein blosser mensch / sondern Gottes eingeborner Sohn / Gott selbst hat für vns gelitten an seinem fleisch / anders würde sein opffer viel zu wenig gewesen seyn für der ganzen welt sünde / so es eines blossen menschen leiden oder opffer gewesen were.

Also glauben wir nun von herzen an Christum / Gottes vnd Maria Sohn / wahren Gott vnd menschen in einer vnzertrenlichen person: Vnd trösten vns dessen / daß er / als vnser bruder herzlich vns liebe vnd vns helffen wölle: Auch als ein All

Rom. 1.

A. Act. 20.

1. Pet. 3.

1. Cor. 2.

D ij mächtig

mächtiger Gott auß aller noth helfen könne.

Von dem ampt Christi wird ferner im Text nur etwas gedacht! Vñ; war Erstlich in gemein/ durch den namen **IESVS** / das ist / Heiland / Seligmacher. Weiter nemlich/ wie es der Engel anders wo erkläret / sein volck selig macht von ihren sünden/ vñ also den namen mit der that trägt // ja im werck das jenige alles erfüllet / war auff zuvor andere zeitliche Heilande des volcks Gottes/ vnd die dergleichen Namen etwa auch gehabt / gedeutet haben.

Matth. 1.

Hebr. 10.

I. Cor. 3.

Aktor. 4.

Dieser ist der rechte vollkommene Jesus / vnd einiger ewiger Heiland/ der mit einem opffer in ewigkeit vollendet / die geheiligt werden. Darumb wir auch in ihm allein/ vnd in keinem andern heyl vñ seligkeit suchen sollen. Dañ einen andern grund kan niemand legen / außser dem der gelegt ist / welcher ist Jesus Christus. Es ist in keinem andern heyl / auch kein anderer name den menschen gegeben / darin sie sollen selig werden / als der Name Jesu.

Hebr. 5.

2. Sam. 7.

Dan. 7.

Darnach wird insonderheit gedacht des Königlichen ampts Christi/ vñ angedeutet/ **Einnahl** / Das es ein rechtmessiges Königreich sey. Dann er werde ihm die chren mit selbst nehmen / sondern Gott werde ihm den stul seines vatters Davids geben. Zum andern/ das es ein geistliches Reich seyn werde vber das haus Jacob/ das ist / vber das heilige volck Gottes/ zu welchem auch auß den heiden gehören/ alle die/ so des glaubens Abrahæ seyn. **Endlich** / Das es werde ein ewiges Reich seyn / dann seines Königreichs werde kein ende seyn / massen auch schon vor längst davon geweissagt vnd verheiffung gethan worden.

So ist demnach nun Christus Jesus vnser rechtmessiger/

hümliz

hümlischer vñ ewiger König / der / von welchem der Vatter selbst
 gesagt hat. **Sihe / Ich hab meinen König eingesetzt auff meinen**
H. berg Zion: Von welchem der Prophet so fremdig der Kir-
chen Gottes zurüffet / Du tochter Zion fremde dich sehr / vnd du
tochter Jerusalem jauchze / Sihe / dein König kompt zu dir /
ein gerechter / vnd ein helffer: Welcher einen Namen geschrieben
hat auff seinem kleide / vnd auff seiner hüffte / also: Ein König
aller köninge / vnd Herr aller herzen. Vnd fürwar / Er / der
Herr Jesus an seinem ort verrichtet wol sein Königlich Ampt
 rechtschaffen. Eines Königes ampt ist / das er sein volck regle-
 re / schütze / ihnen auch Privilegia vnd gerechtigkeiten
 verleihe. Das alles thut Christus gegen seinem volck. Er re-
 gire es mit seinem Geist vnd wort / dann das ist das Scepter sei-
 nes Reichs. Er schützet es wider alle gewalt seiner feinde / ja er
 herrschet mitten vnter seinen feinden / vnd wird ihm nimbmand sei-
 ne schaffe auß seiner hand reißen. Er begabt die seine mit ge-
 rechtigkeit / heiligkeit / fried vnd freud im heiligen Geist / vñ gibe
 ihnen das ewige leben. Allein / das / das ist nun von nöten / das
 doch auch wir thun das ampt rechtschaffener Reichsgenossen
 vnd vnderthanen Jesu Christi.

Vnderthanen gebüret / Das sie ihren König ehren / im her-
 zen / mit worten / geberden / vnd wercken. Also gebüret vns / das
 wir vnsern König Jesum Christum ehren / im herzen / mit wahr-
 rem glauben / vnd heiligen gedanken: mit worten vnd der frucht
 vnserer lippen / die seinen namen bekennen: mit wercken / das wir
 alles thun in seinem namen vnd zu seiner ehre.

Vnderthanen gebüret / das sie ihrem Könige gehorsam seyn
 in allen billigen dingen: Vns gebüret auch vnserm König Jesu
 Christo gehorsam zu seyn vnd ihn zu hören / ja zugehorchen in
 allem / das er vns sagt.

Pfal. 2.
 Zach. 9.
 Apoc. 19.

Pfal. 110.

Johan. 10.

Rom. 14.

Joh. 10.

1. Petr. 2.

Hebr. 13.

Col. 3.

1. Cor. 10.

Rom. 13. 1

Tir. 3. 1.

Act. 3. 22.

D iij Vnder

Gal. 6.
 Matth. 16
 Rom. 5.
 Apoc. 1.

Underthanen gebüret / das sie die reichsbeschwerung tragen helfen / vnd derselben sich mit entschlagen: Vns gebüret im reich Christi die beschwerungen / das ist / das liebe creuß vnserm König vnd haupt Jesu Christo gedultig nachzutragen / der malreichen Christi vns nit zu schämen / Dann wer mein Jünger wil seyn / spricht der Herz / der verleugne sich selbst / vñ nehme sein creuß auff sich / vnd folge mir. Vnd das ist den reichsgewissen Christi so gar nit schimpflich / das sie sich auch der trübsal mit Paulorühmen: Ja der heilige Johannes helt diß für seinen ehren titul / dz er sich nütet / einen mitgenossen der glaubigen / am trübsal / vnd am reich / vnd an der gedult Jesu Christi. Dann wer mit vnserm König Jesu Christo ein mitgenos ist an seinem creuß / leiden vñ gedult / der hat auch an der seligen gemeinschafft deß ewigen reichs Jesu Christi keines wegcs zu zweiffeln.

. Pet. 5.
 Ephes. 6.
 2. Tim. 4.

Underthanen gebüret / wann widerwertigkeit entsethet / vnd feinde deß reichs sich erheben / vnder ihrem König ritterlich zu streitten wider die feinde / vnd ihz blut für das gemeine beste zu zusehen. Vns gebüret wider vnserm König Jesu Christo auch ritterlich zu streitten wider die sünde / welt / vnser eigen fleisch / vnd den Satan / Denen müssen wir widerstehen im glauben / den harnisch Gottes anziehen / vñ vermittelst seiner gnade einen guten Kampff kämpffen / glauben vñ ein gutes gewissen behalten / nicht zweiffelnde / das vns schon beygelegt sey die kron der gerechtigkeit / welche vns der Herz an jenem tage geben wird.

Pfal. 115.
 135.

Ja / wann wir der gestalt vnsern König Jesum Christum ehren / ihm gehorchen / das creuß gedultig nachtragen / vnd wider seine vnd vnser feinde streitten werden / so wird er je lenger je mehr auch mit seiner krafft in vnserer schwachheit mächtig fern / vns erhalten / erretten vnd schützen: ja in der that erweisen / das bey ihm kein ding vnmöglich sey / Dann er ist im himmel vnd kan schaffen was er wil / im himmel / auff erden / im meer

vnd in

und in allen tieffen. Er kan erretten alle die zu ihm treten. Er kan vberschwänglich thun vber alles das wir bitten vnd verhoffen. Er kan vñ wird die grosse macht vnserer feinde plötzlich stürzen/das jederman sagen wird / das hat Gott gethan/ vnd mercken / das es des Herren werck sey. Er kan vnd wird die wolgemeinte rathschläge geben: so es trewlich meinen / vnd die noch vbrige / für menschlichen außgeringe mittel also segnen/ das wir frey bekennen vnd rühmen werden/ Er sey der starcke Gott/dem es gleich gelte / durch wenig oder viel zu helfen: Nur laß vns alles zu seiner ehre richten: Ihme als vnserm ewigen Könige vns ganz ergeben/vnd vertrauen/so wird er vns nit verlassen.

Ephes. 3.

Psal. 64.

1. Sam. 14.

Er/der Herr vnser König vnd Heiland mache es mit vns/wie es ihm gefelt / vns geschehe/wie er wil. Sein will/der ist der beste. Er erhalte nur / vnd vermehre in vns den wahren glauben/hergliche/würckliche/ vñ beständige buß/fröliche hoffnung vnd gedult/vnd helffe vns endlich auß von allem vbel / zu seinem ewigen himlischen Reich. Ihme vnserm Könige Jesu Christo / sampt dem Vatter vnd H. Geist / dem einigen wahren Gott sey ehre vnd danck von nun an in alle ewigkeit/ Amen.



Die



Die Andere Christliche

Gedencck: Predigt / ober der zerstörung /
der weiland löblichen Evangelischen
Statt Magdeburg /

Genommen auß der Thranen: Predigt / unsers Her-
ren Jesu Christi / so er ober die Statt Jerusalem / wegen der
damahls vorstehenden verwüstung derselben
gethan hat.

Quem clades Solyma, quem Magdenburgica clades
Non movet, ut rebus consulat ipse suis,
Festinetq; malos vivendi linquere mores,
Semet in exitium precipitat proprium.

Eingang.

Thren. I.
v. l. l.

Also klagt das volck Gottes nach der ersten
zerstörung der Statt Jerusalem: Wie liegt die
Statt so wüste / die voll volcks war! Sie ist
wie eine wittibe / Die eine Fürstin vnter den heiden / vñ
eine Königin in den Ländern war / muß nun dienen.
Sie weinet des nachts / daß ihr die thränen ober die
backen lauffen. Es ist niemand vnter allen ihren freun-
den der sie tröste: Alle ihre nachsten verachten sie / vñ
sind ihre feinde worden. Also / sage ich / klagt das volck Got-
tes / nach dem der schaden schon geschehen / vñ es zu spath war!

Ziel

Viel weislicher/ha auch viel heilsamer ist es / das wir klagen/
weinen / busse thun / che vns das verderben vberfalle / vnd kein er-
retter mehr da sey. Welches vns dann vnser getrewer heiland
Jesus Christus selbst in heutigen Evangelio lehret mit seinem
eigenen exempel / da er zuvor weinet / zuvor den tempel zu Jeru-
salem reformiret. che die verwüstung komen ist: wo mit er den
Juden zeigen wolte / was sie thun müsten / auff dz sie dem künff-
tigen vnglück entrinnen möchten.

Damit dann die heisse threnen Jesu Christi vnd seine eiffe-
rigere reformation für dñmal vns also zu herzen gehe / das wir
bey zeiten vnser sünden beweinen / vnser gankes leben nach Got-
tes willen reformiren / vnd fernere straffe entgehen mögen / so
last vns zuvorderst den barmherzigen Gott vmb erleuchtung
vnd krafft seines H. Geistes anruffen / wie vns der Herr Jesus
befohlen hat: Vnser Vatter /c.

Textus Luc. XIX. v. 41. ad finem.

No als er nahe hinzu kam / sahe
er die Statt an / vnd weinet vber sie / Vnd
sprach: Wann du es wüsstest / so wärdstu
auch bedencken zu dieser deiner zeit / was zu deinem
friede dienet. Aber nun istis für deinen augen verbor-
gen. Dann es wird die zeit vber dich kommen / das
deine feinde werden vmb dich vnd deine kinder mit dir
eine wagenburg schlagen / dich belägern / vnd an allen
orten ängsten / Vnd werden dich schleiffen / vnd keinen
stein auff dem andern lassen / Darumb / das du nicht
erkennet hast die zeit / darinnen du heimgesucht bist.

E Vnd

Vnd er gieng in den tempel / vnd sieng an außzutreiben die darinnen verkauften vnd kauften / Vñ sprach zu ihnen: Es siehet geschrieben: Mein haus ist ein bett haus / Ihr aber habts gemacht zur mördergruben. Vnd lehret täglich im tempel. Aber die hohenpriester vnd Schriftgelehrten vnd die sarnembsten im volck trachteten ihm nach / das sie ihn umbbrächten / Vnd funden nit wie sie ihm thun sollten: Dann alles volck hieng ihm an / vnd höret ihn.

Auslegung.

Wird dieses Exempel / welches der HERR in heutigen Evangelio vns vor augen stellt / nicht beweget zur reu vber die sünde / vnd zu herztlicher bußfertigkeit / der muß wol ein steinern / das ist / ganz verstocktes vnd unbewegliches Herz haben! Dann es prediget allhier Christus von der endlichen zerstörung der herlichen vnd berühmten Statt Jerusaleum / dergleichen zerstörung vnd jammer nirgend in keiner Historien mehr gelesen wird. Vnd ist traum ein solch exempel / das / weres höret / vnd recht betrachtet / demselbigen billich beyde ohren gelien / das herz weinen / vnd alle glieder zittern möchten.

1. Sam. 3.
v. 11.

Genef. 7. Schrecklich war die verwüstung der ersten welt durch die Sündflut / da alles fleisch darin ein lebendiger athen gewesen / (den Noah selb achten / vnd was mit ihm in den Kasten gangen / außgenommen /) zu grund gangen / vnd umbkommen ist. Aber noch schrecklicher ist die zerstörung der Statt Jerusaleum!

I.

Dann so viel grawsamer das ist / wañ ein leiblicher Vatter

sein lie

sein liebes Kind in jähem zorn zusüßen harret / oder ein herz
seine angeborne vnderthanen selbst plötzlich oberfelt / vnd zu
grunde verderbet / als wann es ein frembder oder ein feind thut: so
viel grausamer ist auch die endliche zerstörung der Statt Jeru-
salem / als die verderbung der ersten welt. Sintemal ja Gott
mit denen so in der sündflut vmbkommen seind / keinen solchen
bund jemahls gemacht hatte / wie hernach mit dem Jüdischen
volck / da er gesagt hat zu Abraham: **Ich wil dem Gott**
seyn / vnd deines samens nach dir.

Gen. 17. 7

In der sündflut gieng die welt auff einmal durch / vnd ist
alles fleisch mit einander auff einmal vmbkommen: In der zer-
störung Jerusalem aber hat das Volck vnzählich vielerley mar-
ter / schrecken / angst / peinigung vnd mancherley todt leiden
müssen.

II.

Dort in der sündflut seind Eltern / Kinder / verwandten zu-
gleich dahin gefahren / vnd hat keiner des andern elend lang sehen
dörffen: Zu Jerusalem aber haben Eltern ihre Kinder / Kinder
die Eltern / ein freund vnd verwandter den andern müssen sehen
peinigen / oder in hunger pestilenz vnd andern krankheiten ver-
schmachten / ja auch auff den gassen verfaulend sehen / vnd rie-
chen müssen.

III.

Dort in der sündflut haben die menschen ohne zweiffel mit-
einander ein mit leiden gehabt: In der zerstörung Jerusalem hat
auch menschliche affection vnd die natürliche zuneigung sich
verloren / dermassen das je einer den andern selbst angefallen /
die speise einander auß dem munde gezogen / ja auch mütter ih-
rer leiblichen Kinder nit verschonet haben!

IV.

Dort in der sündflut seind die menschen schlechter dings
gestorben vnd vermodert: Zu Jerusalem aber seind sie jämmer-
lich gemartert / vnd ihrer vielen die leiber erbärmlich auffge-
schnitten worden / in deren gedärmen die Soldaten gelt suchten!

V.

Josep. de
bell. Jud.
lib. 5. c. 27
28. & seq.

E ij der

de: meinung als hetten etwa die Jüden gelt verschlungen. Ihrer viel sind an creuzen geschlagen vnd sonst auff mancherley weise gemartert worden.

VI.

In der sündflut straffte Gott die welt nur durch einen feind/ nemlich nit wasser: Die Jüden aber mit vielen. Dañ die Römer stritten wider sie mit feuer vnd schwerd. Die lufft stritte wider sie mit gift vnd pestilenz: Die erde versagte ihren leichnammen die herberge / das dieselbe nicht kondten noch mochten alle begraben werden:.

II

Schrecklich war die erste zerstörung der Statt Jerusalem vnd des tempels/ aber viel schrecklicher ist diese letzte gewesen: als da alles verwüestet / vnd keine erbawung derselben Statt vnd tempels mehr zu hoffen ist. Das allerschrecklichste aber ist / das das Jüdische Volck vber solchen zeitlichen verlust auch mit geistlicher blindheit vnd verstockung geschlagen ist / vnd in jhrem jnhumb nunmehr vns zum spiegel vnd abschew in der welt zerstreuet vmbher gehet.

III

Wen dann das exempel nicht zur busse reiset / der muß / sage ich abermal / ein steinern vnd unbeweglich hertz haben. Vñ zwar weil jhrer viel der schrift nicht glauben / vnd so wol dieses als auch andere alte exempel der gerichte Gottes nur für mairlein halten / so hat vns Gott noch vnlängst ein frisches vnd sehr erbärmliches exempel für augen gestellt in vnserm Vatterland / welches wir vns billich recht schafften zu gemüt ziehen / vnd eine warnung für sicherheit sollen seyn lassen.

VI

Wiewol ich derhalben mir für genommen hatte / nachdem ich den ersten theil dieses Evangelii von der zerstörung Jerusalem hievor außführlich erkläret / für dismal nur den andern theil / nemlich von der reformation des tempels / vorzunemen. Jedoch weil vns Gott so gar newlich / wie gedacht / ein frisch exempel seines gerichtts vnd feuerreiffers sehen lassen / welches durch gelegenheit des heutigen Evangelii vns desto besser zu ge-

V

h. 9. 10
vul. 1. 2. 3.
v. 3. 7. 8.
v. 1. 2. 3. 4.

müt ge

müt geführet werden kan / als wollen wir auß dem ganzen Evangelio für diesmal nur folgende zwo Hauptlehren außziehen / vnd bedencken:

Fürs Erste / Was man damit gewinne / wenn man lang genug nach eigenem willen in sicherheit gelebt / vnd weder nach Gott / noch nach seinem wort etwas gefragt hat / nemlich nichts anderst / als dz Christus betrübet / vnd Gottes endliche straff verursacht wird.

Zum Andern / Wie man es damit machen müsse / daß der zorn Gottes abgewendet / vnd seine straffe verhütet werde.

Ein jeder siket ohne zweiffel selbst / daß es nötige vnd nützliche Puncten seyn / Darumb E. L. fleißig wolle auffmercken.

Du aber H. G. d. Jesu predige selbst in vnsern hertzen / Vnd gib / Daß deine heisse thranen vnd eifferige reformation vns besser als den Juden zu hertzen gehe / vnd viel fruchte zu deiner ehr / vnd vnserer zeitlichen vnd ewigen wolfahrt / Amen.

Vom Ersten.

Wiewol es nun die hochmütige vnd ruchlose Weltkinder gering achten / daß sie nach ihrem willen leben / vnd weder nach Gott / noch nach seinem wort etwas fragen: Ja viel mehr sich hoch vnd gut düncken seyn / in dem sie alle warnungen trewer Diener Gottes in wind schlagen / vnd sich auch wol denselben widersetzen dörfen: Jedoch sehen wir auß diesem Evangelio / was solche gottlose leut endlich damit gewinnen / Nemlich:

I.

Erstlich / Das Jesus Christus der Sohn Gottes herzlich durch solch ihr weesen betrübet / vñ ihme die heisse lehrenen aufgez gepresset werden! Wie dann Christus als er die Statt Jerusaleim angesehen / eben vmb solcher ihrer sicherheit willen vber sie geweinet hat: Was denn die vrsach von ihm selbst endeckt wird / da er beklaget / das sie nicht bedencken was zu ihrem friede diene: Ja das sie nicht erkennen haben die zeit darinnen sie heimgesucht seyn; sondern seind vndanckbar vnd gottlos gewesen.

Böse Kinder seind das / die sich also vnghehorsam vnd gottlos verhalten / das ihre liebe Eltern ihrent halben weinen vnd threnen vergießen müssen: Aber auch böse leute seind das / die sich gegen vnserm getrewen heiland Jesu Christo also vndanckbar vnd gottlos erzeigen / das er ihrent halben betrübt vnd zu weinen verursacht wird. Christi threnen seind thwere threnen / ja sehr schwere threnen / darinn wir sie wol recht ansehen mögen. Ich wil jekund nit davon sagen / wie sie als mitleidens vnd erbarmungs threnen / als lehr / lieb / klag / vñ betthrenen / ja als lockthrenen anzusehen seyen / die menschen zur busse zu locken / wovon außführlich vorm Jahr gehandelt worden / sondern wir sollen sie jekt ansehen als schreckthrenen / die vns von solcher sicherheit / vndanckbarkeit / vnd verstockung / dergleichen bey den Juden gewesen / billich abschrecken sollen. Sintemal wir ja darauff sehen / wie hefftig es Gott erzürne / wie inniglich es Christum betrübe vnd schmerze / wann die menschen nicht bedencken wollen was zu ihrem friede dienet / wann sie nicht erkennen die zeit darin sie heimgesucht seyn / nemlich in gnaden / wie hie bevor der vndercheid der heimsuchung Gottes mit mehrerm erkläret worden.

Vnd

Vnd zwar je grösser die wolthaten Gottes seind / je schänd-
 der vnd schrecklicher ist auch die vndanckbarkeit / vnd desto heff-
 tiger wird auch Gott erzornet. Nu hatte ja Gott dem Jüdi-
 schen Volck sehr hohe vnd treffliche wolthaten erzeiget / anders
 sehnd zugeschwigen.

Einmal / Sonderlich in dem / daß er sie zu seinem volck vnd
 Kindern auffgenomien / vnd vnter aller welt völkern sie allein
 gewündiget hat / einen bund mit ihnen zumachen vnd ihr Gott
 vnd Vatter zu seyn / wie er denn gesagt hat zu Abraham / Ich
 wil dein Gott seyn vnd deines samens nach dir. Darvnt
 auch Moses diese wolthat so hoch rühmet / vnd spricht: Wo ist
 so ein herrlich volck / zu dem Götter also nahe sich thun / als sich
 der Herr vnser Gott zu vns thut. Vnd anders wo spricht er:
 Siehe der hümel vnd aller hümel hümel / die erden vnd alles was
 drinnen ist / das ist des Herrendenies Gottes: Noch hat er allein
 zu deinen Vätern lust gehabt / daß er sie liebet / vnd hat ihren sa-
 men erwehlet nach ihnen / Euch / vber alle völker / wie es heut
 geses steht. Gottes Volck aber seyn / mit Gott im bunde ste-
 hen / das ist ein grosses!

Vber das aber / Vnd zum andern hat ihnd auch Gott sein
 gesetz vnd zeugnuß gegeben / vnd in demselben sich selbst / seinen
 willen vnd den weg des lebens ihnen geoffenbaret. Er hat Jacob
 gezeiget sein wort vnd Israel seine sitten vnd rechte. So hat er
 damals keinen heiden gethan / noch sie wissen lassen seine rechte.
 Diese wolthat vnd vorzug vor andern rühmet gleicher gestalt
 Moses vnd spricht: Wo ist so ein herrlich Volck das so gerechte
 sitten vnd gebott habe / als alle diß gesetz / das ich euch heut
 ges fürlege. Bey welchem gesetz vnd gebotten dan auch gewesen
 seyn die herrliche Evangelische verheissungen von dem Messia
 vñ dem gebenedeyten weibes samens / der der schlangen den kopff

zertret

I.

Gen. 17. 7.

Deut. 4. 6

Deut. 10.

14. 15.

II.

Rom. 9. 4

Psal. 147.

Deut. 4. 8

Gen. 3. 15.

Gen. 22.

8.

Act. 13. 11.

zertreten / vnd in dem alle vöcker auff erden gesegnet werden solten. Wodurch dann der heilige Geist auch damals in den Herzen der auserwehltten den wahren glauben gewürcket hat / daß auch sie durch die gnade Jesu Christi selig worden.

III.

Beneben diesen geistlichen hümlichen wolthaten hat Gott sein volck auch mit zeitlichem leiblichen segen gar reichlich begabet. Hat ihnen das gelobte Land eingegeben: Ein Land da milch vnd honig innen gestossen. Vmb ihrent willen hat er ganze vöcker vertrieben / nidergeschlagen vnd verbannet: Vmb ihrent willen hat er grosse wunder vnd thaten gethan / ganz Egypten land gestrafft / das rothe meer zertheilet / sie triekens fuß hindurch geführt / den Pharaon aber mit seinem ganzen heer ersäufet: Vmb ihrent willen hat er brot vom himmel regnen lassen / wasser auß steinfelsen gebracht / den Jordan zertheilet / vnd sie mit mächtigem arm vnd außgeredter hand geführt. Summa / Vmb ihrent willen hat Gott wunder gethan im himmel / wunder auff erden / wunder in den wassern vnd steinfelsen / wunder an menschen / vögeln / viche / vnderdgarwachsen. Vnd sonderlich hat es Gott wol gefallen auß dem geschlechte dieses volcks seinen einigen allerliebsten Sohn Jesum Christum geboren werden zu lassen / vnd also sich in dieses volcks leibliche blutsfreundschafft zubegeben / welches traun ein grosses ist / massen es Paulus selbst hoch rühmet / vnd spricht: Daß auß ihnen Christus herkomme nach dem fleisch / der da ist Gott vber alles gelobet in ewigkeit.

Rom. 9. 5.

Sind das nit grosse vnd vber alle massen herrliche wolthaten Gottes? Was solte er ihnen mehr erzeigt haben? Vnd danoch haben sie sich so vndanckbar vnd widerspenstig gehalten / vnd nit erkendt die zeit / darinnen sie so genedig sind heimgesucht worden! Solte dann nun Christus nit weinen vber solcher ihrer verstockung vnd vndanckbarkeit?

Aber

Aber ich achtere vnnoth seyn / daß wir vns mit der Jüden
blindheit länger auffhalten / dann / leider / bey vns / wie nicht ge-
ringere wolthaten Gottes / also auch nicht geringere vndanck-
barkeit zu finden ist. Ja mehr gutthaten hat vns Gott erzeiget /
als vorzeiten den Jüden im alten Testament.

Dann Einmal hat Gott auch vns nunmehr durch Chri-
stum zu gnaden vnd in seinen bund auffgenommen / die wir doch
auß der heidenschafft herkommen vnd weiland ohne Christo /
frembde / vnd ausser der bürgerchafft Israeltis / ja frembde von
den Testamentern der verheissungen / vnd also ohne Gott in der
welt waren. Wir waren die wilde öhlzweige. Nun aber hat Gott
die natürliche zweige zerbrochen / daß wir hinnein in den guten
öhlbaum gepfropffet wurden. Wir waren weiland nicht Got-
tes Volck / nun aber heissen wir Kinder des lebendigen Gottes.
Er hat sich mit vns nunmehr verlobet in ewigkeit: er hat sich mit
vns vertramet in gerechtigkeit vnd gericht: in gnade vnd barm-
herzigkeit: ja im glauben hat er sich mit vns verlobet / vnd wir er-
kennen den Herren. Wir / die wir weiland in vngnaden waren /
seind nunmehr das außgewählte geschlecht: dz Königlische pries-
terthumb: das heilige Volck: das Volck des eigenthums Got-
tes. Wol aber dem Volck des der Herr ein Gott ist / das Volck
das er zumerbe erwöhlet hat! Niimmermehr können wir Gott ge-
nug danken für diese seine gnade / wann wir zuruck gedencken in
was für elend vnser Voreltern gestockt seyn!

Nächst dem aber / vnd Fürs andere / hat Gott auch vns
nunmehr eine lange zeit sein heiliges seligmachendes wort geze-
ben / seine sitten vnd rechte vns wissen lassen / vnd in vieler hertzen
durch die gnade seines heiligen Geistes glauben vñ busse gewür-
cket. Ja er gibt noch das wort mit grossen scharen Evangelis-
ten / vnd vnderläßt nichts / das er thun solte an seinem weinberge.
Vnd / o wie rein vnd lauter ist vns Gottes wille biß daher gepres-

Eph. 2. 12.

Rom. 11.
19. & 24.

Hof. 1. 10.

Hof. 2. 19.

1. Pet. 2. 9.

Psal. 33. 12.

Psal. 68. 12.

diget worden! **D**wie hell vnd klar hat vns die Götliche warheit
bisher vnter die augen geschienen! **J**a viel clarer / als denen im
alten Testament / welche noch mit vielen schatten vnd dunkeln
fürbilden zuthun gehabt.

Vber das aber vnd **zum dritten** / hat vns Gott auch eine
lange zeit mit jrdischen zeitlichen gütern vñ wolthaten reichlich
Jer. 5. 24. gesegnet / viel jahr lang den lieben frieden verließ / die ernde jähr-
lich vnd trewlich behütet: **S**ich nit vnbezeuget gelassen / hat vns
viel guts gethan / vom himmel regen vnd fruchtbare zeitung ge-
Aet. 14. 17 geben / vnd vnser herzen erfüllet mit speise vnd mit freuden. **J**a
noch jetzt bey diesen betrübten schweren zeiten / vnd noch in die-
Psa. 65. 10 sem Jahr hat Gott das land heimgesucht / vnd es sehr reich vnd
fruchtbar gemacht / sein gewächß gesegnet / vnd das Jahr ge-
krönet mit seinem gute

Summa der Her hat auch an vns bewiesen / seine Väter-
terliche reiche güte / vnd sich als vnsern Gott in der that erzeiget.

Aber wie haben wirs dagegen gemacht? **W**ie haben wir
solche wolthaten Gottes erkant vnd angelegt? **W**ie haben wir
vns gehalten. **M**it einem wort: **V**ndanckbar.

Auch wir haben nicht bedacht was zu vnserm friede-
diene / nicht erkant die zeit darinnen wir heimgesucht
seind. **W**er hat sich beflissen vnter vns mit rechten ernst den
bund zuhalten / darinnen wir mit Gott stehen / welcher durch
die heilige tauß versigelt ist / vnd durch den gebrauch des heiligen
Abendmals zum offtern erneuert worden? **W**ie haben wir vns
gehalten gegen das liebe heilige wort Gottes / vnd die Diener
desselben?

Ist doch fast nichts vnwerthers vñ verachteters gewesen! **D**
wie ist mandes Gottesdiensts so müde vnd oberdrüssig worden!
Wie hat man die heilige Sacramenta verachtet / alle warnun-

gen in

gen in wind geschlagen / ja wol noch gehönet vnd verspottet. Da
 hat fast kein gottslästerer / kein wucherer / kein trunckenbold / kein
 vnzüchtiger od' haderer nach einiger warnung gefragt / sondern
 sich wol truzig widersetzt! Die zeitliche güter aber belangend /
 hat die nicht / der meiste theil zum geiz / zu vndertrückung der
 armen / zuschwelgeren vnd fleischlichen lüsten / ja auch zu aller
 ley verfluchtem newem pracht angewendet / vñ in euserster sich-
 erheit gelebet? Were demnach kein wunder / Wann Christus
 auch vber vns noch heute weinete / ja wann der himmel selbst
 blut vber vns schwisete! Das mögen wir aber wol wissen / ob
 schon Christus für seine person jetzt in der herlichkeit nit trauert
 oder weinet / das er gleichwol nichts destoweniger in seine from-
 men glaubigen gliedmassen / vnd getrewen Dienern freylich wei-
 net / als welche solch vnordentlich wesen herzlich beseuffzen vnd
 mit threnen beklagen / wor auff der Apostel sibet / wan er sagt: Ge-
 horehet ewern Lehrern vnd folget ihnen / auff das sie ihr ampt mit
 freuden thun / vnd nit mit seuffzen / dann das ist euch nicht gut.

Heb. 13.
 v. 17.

Vnd diß ist das erste / das man mit sicherheit vnd vndanck-
 barkeit gewinnet / nemlich Christi thranen vñ weklagen. Weil
 aber die ruchlose welt nichts darnach fragt / wann gleich alle
 frommen auff einmal / vnd Jesus Christus selbst noch so herz-
 lich vnd bitterlich weinen solte / wann es nur jnen nicht schadete.

I.

So ist zu wissen fürß andere / D; man auch auff die verach-
 tung der gnedigen heimsuchung Gottes eine schwere straffe /
 ja wol eine endliche vnd gänzliche verwüstung zugewarten hat.
 Dann / wann die Gottlosen dem Herren Christo vnd seinen
 glaubigen weinens vnd seuffzens genug gemacht haben / so ist
 gewiß / das auch ihnen endlich ihr weinen nit wird außbleiben
 sondern alles trawren / weklagen vnd vnglück wird vber sie
 selbst außbrechen. Vnd eben das verkündiget der Herr Jesus

II.

F ij auch

auch der Statt Jerusalem vnd dem Jüdischen Volck / vnd spricht: Es wird die zeit vber dich kōmen / daß deine feinde werden vmb dich vnd deine Kinder mit dir eine wagenburg schlagen / dich belägern / vnd an allen orten ängsten / vnd werden dich schleiffen / vnd keinen stein auff dem andern lassen. Dis sagt Christus wider die Statt / welche doch in der schrift genennet wird die heilige Statt: Die Statt Gottes; in welcher herrliche ding geprediget wurden; da der Herr sein feuer vnd herde hatte; die er ihm erwehlet vnd lust hatte daselbst zu wohnen. Noch hat dieser Statt nicht mögen verschonet werden! Wie viel weniger haben ihne andere Stätte einige sicherheit einzubilden / wo sie es nicht besser machen? Vnd damit wir nicht meinen / es seyen bloss vnd nichtige trāwort die Christus alhie redet / müssen wir den einfältigen zu mehrer nachrichtung / vnd vns allen zur warnung nur etlicher massen anzeigen / wie alle diese wort Christi so vnsehlbar / ja schrecklich seyen erfüllet worden / worin wir dann die wort des texts sonderlich in acht nehmen wollen.

I.

Vnd anfänglich weissaget Christus / die feinde der Juden werden vñ die Statt Jerusalem eine wagenburg schlagen vnd sie belägern. Ist geschehen. Dann im Jahr Christi 71. vmb den 14. Aprilis ist Titus Velpasiani Sohn der Römische Feldherz vor die Statt mit seiner macht kommen / dieselbe belägert / vnd dermassen vmbgeben / daß niemand entriñen können / vnd iff eben damals wegen des Osterfests das ganze Jüdische Volck in der Statt Jerusalem versamlet gewesen / vnd mag sich die menge des volcks / wie dieselbe einsmals von Cestio auff ein fest vberschlagen worden / gegen die sechs vnd zwanzigmal hundert tausent menschen belauffen haben. Daß also Gott die Jüden allzusammen gleich als in einem Kercker vnd noch stall

Weil

Matth. 4.
Pfal 46.
Pfal. 87.
Efsai. 31.
Pfal. 132.

Joseph.
de bello.
Jud. lib. 6.
cap. 45.

eingeschlossen / damit er sein gericht an ihnen erweisen vnd Christi weissagung erfüllen möchte.

Darnach spricht Christus auch : Sie werden dich an allen orten ängsten. D wie schrecklich ist diß erfüllet worden!

Geängstiget wurden sie **Erslich** mit der belägerung. Dann was das für ein angst gebere / also mit feinden vmbgeben vnd beschloffen seyn / daß man weder auß noch ein kommen könne / ist wol zuerachten / vnd werdens die jenige etlicher massen wissen / welche sich erinnern / wie ihnen zu muth gewesen / als vor wenig Jahren diese Statt feindlich vmbgeben gewesen. Gott bewahre vns / daß wir es nit fermer erfahren!

Geängstiget wurden sie **Fürs andere** mit hungers noth. Dañ weitem solche schreckliche menge Volcks in der Statt gewesen / vnd darzu das getreide verbrand war / enstund eine solche hungers not / daß das Volck das ledder von den schuen / gürteln / tartischen / ja auch mist / faul heu / vnd andere ding / so sonst nicht zu genieffen gewesen / gessen haben.

Sie fielen einander selbst in die häuser speise zuzsuchen / Es haben die eheweiber ihren männern / die kinder den eltern / ja auch die mütter ihren liebsten kindern die speise auß dem munde genommen. Ja es hat eine adeliche Matron ihr eigenes liebes Kind auß grosser hungers noth vnd verzweiffelung geschlachtet / gekochet / vnd zum theil alibereit gessen / vnd ist also ihr leib / der das Kindlein geboren hatte / widerumb des Kindes grab worden. Vnzehlich viel seind für hunger verschmachtet / dahin gefallen vnd gestorben.

Geängstiget wurden sie **Fürs dritte** mit pestilens vnd giftigen feuchen / dermassen / daß vnmöglich gewesen ist / die leute alle zubegraben / sondern seind in der Statt hin vnd wider mehrer theils liegen blieben / theils wie holz hauffen vber einan-

der geworffen worden / wodurch der gestank vnd die seuchen vermehret würden. Vnd hat einer so zu Tito entzumen berichtet / daß zu einem thor hundert vnd fünfzehen tausent / acht hundert vnd achszig leichnam seyen außgetragen vñ hingeworffen worden

II
Iosep. l. 5.
c. 38. & l.
6. c. 1.

Hernach hat sich auch befunden / daß auff die sechsmaht hundert tausent Körper heraus geworffen worden. Die oberige / so in der Statt gebliebē / vber die mawern hundert geworffen / vnd in die häuser zusammen geschleiffet worden / seind nicht zu zehlen gewesen.

Iosep. de
de bello
Jud. lib. 4.
c. 1. & 14.
& seqq.

Geängstiget seind sie worden Fürs vierdte durch auffruhr in der Statt. Sintemal sie sich in drey hauffen zertheilet / vnd erbärmlich blut vergiessen in der Statt angerichtet haben.

Idem lib.
6. c. 26.

Geängstiget seind sie worden Fürs fünffte als die Statt eingenommen worden. Dadann / wie leicht zuerachten / sehr schrecklich mit ihnen gehandelt worden / vnd ein solches blut vergiessen vorgangen / daß an vielen orten das auffgangene sewer durch menschen blut erleschet / vnd ist den zehenden Augusti der Tempel verbrand / den 8. Septembris aber die ganze Statt vollend in die asche gelegt worden. Vnd ob wol Titus des herzlichen gebäwes des Tempels sehr gern verschonet hette / jedoch ist derselbe von einē Römischen Kriegsknecht angezündet worden / vnd hat die sewers brunst nicht mögen gedempfft werden / dann Christi weiffagung muste erfüllet seyn.

III.

Ruffin. li.
6. c. 6.
Egefi. li. 5.
cap. 9.
Iose. l. 5. c.
13. & 14.

Endlich spricht Christus: Sie werden dich schleiffen / vnd keinen stein auff dem andern lassen. Ist auch geschehen! Dann ob es wol ein vberaus schöne Statt / vnd der Tempel sehr herzlich vnd schön gebawet gewesen / Also / daß auch die Jünger des HERRen einmahls dasselbe mit verwunderung Christo zeigten / Jedoch hat es alles in grund zerstöret / in die a-

sche ge-

sehe gelegt vnd geschleiffet werden müssen / nach dem wort des Herren. Vnd ist diese weiffagung vnd fluch Christi vber Jerusalem vnd den Tempel dermassen kräftig / daß sie bis auff diese stunde nicht mehr haben können auffgerichtet werden. Es haben sich zwar die Juden vnderstanden / eins mahls zun zeiten Adriani, aber sonderlich zur zeit des abtrünnigen Juliani, die Statt vnd den Tempel wider auffzurichten / wo zu ihnen Julianus allen vorschub vnd hülff gethan hat / dem Herren Jesu zu truz. Aber Gott hat solch ihr fürnehmen zuschanden gemacht / in dem / was sie gebawet / durch erdbeben zerissen / mit feuer verbrand / vnd der kalck sampt andern materialien durch sturmwinde zerstreuet worden / daß sie es haben müssen bleiben lassen. Ist also Julianus, vnd die Juden zuschanden worden / Christi wort aber bestehet / vnd die zerstörung trieffet auff sie bis auff diesen tag. Dann sie verstunden nicht / wie Chrylostomus wol erinnert / daß sie sich vnmöglichlicher ding anmassen. Dann so nur menschen nach ihrem willen die Statt verstöret hetten / köndte sie von menschen wider erbawet werden / Nun sie aber Gott zerstöret hat / vñ zerstöret wil gelassen haben / ist vnmöglich / daß sie durch menschliche macht widerumb auffgerichtet werde. Also nun ist Jerusalem / sampt dem Tempel geschleiffet / in grund vertilget / vñ kein stein auff de andern gelassen worden.

Die menschen belangend seind deroselben in die eylffmal hundert tausend todt blieben : auff sieben vnd neunzig tausend gefangen genommen: viel 1000. verkaufft worden / je 30. Juden vor eine silberling / gleich wie sie Christum vor 30 silberling verkaufft hatte / viel Jude sind auch zu de ende von de Römern weggeführt worden / d; sie dieselbe zu allerley dienstbarkeit gebrauchen / sonderlich aber in ihren schawspielen sie den wilden thieren vorwerffen mit denselben streiten vnd zerreißen lassen möchten. Massen dann bald hernach zu Caesarea in einem schawspiel zwei tausend fünffhundert Jude also auffgeopffert vñ getödet worden seind.

Es hat

Matth. 24
verf. 1.

Ammian.
lib. 23. c. 1.
Ruff. 1. 1.
cap. 38.

Joseph. li.
6. c. 45.

Es haben auch die Römische Kriegsknechte in einer nacht mehr als zwey tausend Jüden lebendig die häute auffgeschnitten / vnd in ihren därten golt gesucht / welches jezmal ein grosser jammer gewesen. Aber die zeit leidets nit ein mehrers zumelden / vnd mögen hievon auffgeschlagen vnd gelesen werden die fürtreffliche Historienschreiber Iosephus, Egesippus, Ruffinus, Socrates, Ammianus, Paulus Diaconus, vnd andere mehr. So gehen vns auch die Jüden selbst noch heutigs tags / als lebendige zeugen solcher verwüstung vñ schrecklichen gerichtes vor vns fern augen herumb. Vorauß dann genugsam erscheinet / daß man / wie ob gemeldet / mit verachtung Göttliches worts vnd mit sicherheit nicht nur Christi threnē verurrsache / sondern auch Gottes ernste straffen vnd endliches verderben auff sich selbst laide. Vnd solte ich zwar nunmehr eben diese lehr auch mit andern alten vñ denckwürdigen exempeln / der gerichte Gottes beweisen vnd darthun: als da ist / das exempel der ersten welt / welche Gott mit der sündflut verderbt; Sodomæ vnd Gomoræ: so durchs feuer vom himmel verzeret: Das exempel Egypti: die mancherley heimsuchungen der Kinder Israel zuzeiten der Richter vnd vnterschiedlichen Königen / die erste zerstörung Jerusalems: die Babylonische gefängnuß: die verwüstung vnd zerstörung der Orientalischen Länder vnd Kirchen / vnd dergleichen. Aber mich dünckt / weil der meiste theil solche alte exempel bisher gleichsam nur für fabeln gehalten / vnd in wind geschlagen hat / es habe vns Gott newe exempel seines fereiffers vnd schrecklichen gerichtes vor augen stellen wollen / deren wir in kurzer zeit vnterschiedliche erfahren haben. Ich wil aber jetzt nit sagen von dem grausamen vndergang der Statt Plurs: Von dem erbärmlichen Blutbad in Beldin. vñ der verwüstung vñ beraubung benachbarter herrlicher Länder vñ Kirchen: Von dem erbärmlichen blut vergiessen so vnlängst zu Wänden geschēhē: welche exempel zwar kläglich genug seyn / vnd vns billich zur warnung dienen sollten.

dienen

Weil aber auch diese vns wenig zu herzen gehen / hat vns
 G. D. noch erst vor drey Monden ein ganz kläglich vñ schreck-
 lich Exempel zum vberflus vorgestelt an der weiland berüm-
 pten / reichen / vnd festen Statt Magdeburg / welche Statt
 vngesehr vor achtzig Jahren auch feindlich vñgeben / aber den-
 noch durch Gottes genade mächtig errettet ward / vnd ist in der-
 selben bis auff ihre zerstörung das Evangelium gepredigt wor-
 den. Ohne zweiffel aber seind ihrer viel darinnen gewesen / wel-
 che solch ehrentliche wolthat vnd hülffe Gottes nit recht erkand /
 noch ihme gebürlich dafür gedancket haben! Vnd nun hat sie
 G. D. nach seinem vnerforschlichen heiligen vnd gerechten
 willen also jämmerlich zerstören lassen / das vber ihrer verwü-
 stung meniglich / wer es höret / sich entsetzen muß! Welches
 Exempel ich dann einzuführen mit fleiß bis auff die erklärung
 dieses Evangelii / vmb vnserer / mehrer warnung willen / gespa-
 ret habe.

Sleid. l. 22

Es ist aber ermelte Statt Magdeburg / nachdem sie vom
 erste Martii an dieses 1631. Jars feindlich belägert gewesen / den
 erstten Maji durch verrätherey erobert / Dadañ also bald das
 vnmenschliche würgen / schlachten vnd morden angangen / da
 bey des jung vnd alt / man vnd weib / Jungfrauen vnd vnschul-
 dige kleine kinderlein erbärmlich nidergehawen / erschossen / er-
 stochen / viel fürnehme adeliche vnd andere Frauen vñ Junfra-
 wen gefangen / ihrer ehren beraubt / theils auch vor die Statt in
 das freye Feld geführt vnd öffentlich geschändet / viel auch end-
 lich darzu gar vmbbracht worden. Nachdem auch die Statt an
 vnder verschiedenen orten angezündet / vnd im feuer gestanden / ha-
 ben die kriegsknechte viel tausend menschen jung vnd alt vn-
 barmherziger weise lebendig ins feuer geworffen / vnd ihre lust
 daran gesehen / ihrer viel auch hauffen weise in die Elbe gejagt
 vñ geworffen. Ja es haben viel fürnehme Matronen vñ Jung-
 Frauen einander hauffen weise in die arme gefast / vnd sich zu-

G

sam

samen in die Elbe gestürzt / damit sie dem grausamen jammer entgehen / ihre ehre retten / vñ nicht geschändet werden möchten.

Viel haben sich in die Keller vñ Gewelbe versteckt / seind darinnen von denen im brand eingefallenen Gebäwen verschüttet vnd erstickt. Etliche hundert mann aber haben sich inwendig in den wällen verkrocht / vermeinende nach der furi davon zukommen / seind aber nichts desto weniger hernach auch nider gehawen vnd ermordet worden.

Summa die grausame geübte Tyranny / der grosse jammer vnd elend / das heulen vnd steinerbarmende zettergeschrey der armen vnschuldigen Kinderlein / so wol auch Jungfrauen schändung / würgen / plündern / vnd ransionirung ist nit genugsam außzusprechen. Bñ ist also diese berümtte Statt mit einander ohne allein die Thumbkirche vnd etliche häuser / welche stehen blieben / in etlich stunden in die asche gelegt vnd zerstört: ein vnsegllicher grosser schatz / viel donnen goldes werth / so theils darein gestöhet vnd versteckt gewesen / zum raub worden / mehrer theils aber in der grossen Feners brunst mit auffgegangen. Vber zwanzig tausent menschen seind darin ermordet vnd verbrand / die todten auff hauffen geschüttet / vnd fuder weise in die Elbe geworffen worden. Worüber die Evangelische Christen heilich von herzen seuffzen / an solchem Exempel sich spiegle / busse thun / ja auch zu Gott inbrünstig ruffen soll / das er doch an solchem jammer vnd geübter schrecklicher rache ihm vätterlich genügen lassen / das vnschuldig vergossene vnd noch gen Himmel schreiende blut erhören / die gefaste ruthe zerbrechen vnd von sich werffen / vnd vnser hinfort vmb Christi millen vätterlich verschonen wolle.

Jer. 9. v. 1.

Vnd möchte da ein Gottseliger mensch wol seuffzen / mit Jeremia: Ach das ich wasser genug hette in meinem haupt / vnd meine augen thränen quelle weren / das ich tag vnd nacht beweinen möchte die erschlagene in meinem volck!

Vnd

Vnd mögen wir wol sagen / Dasz diese zerstörung der Statt Magdeburg noch in etwas grausamer sey / als die zerstörung der Statt Jerusalem.

Dann erstlich / Ist Jerusalem durch gantz vn-
glaubige heiden vnd öffentliche feinde Gottes / welche weder von Gott noch von seiuem wort etwas gewußt haben / zerstöret / welches kein wunder ist: Diese Statt aber ist also jämmerlich verheeret / von denen / die doch für heilige Christen / Gottes volck / vnd der wahren Kirchen glieder / ja dafür gehalten werden wollen / als ob sie vnserß Vatterlands beste freunde vnd beschutzer weren / vnd sind gleichwol so vnbarmerzig / nicht allein mit ihrem feinde / sondern auch mit den armen einwohnern / die an Jesum Christum geglaubt / vnd seinen Namen bekandt vnd angeruffen haben / ja mit vn-
schuldigen Weib vnd Kindlein umbgangen!

Zum andern: Mit der zerstörung der Statt Jerusalem hatte der Römische heide Titus ein herzlich mitleiden / es jammerte ihn des grossen elends / rechte seine hände gen Himmel auß / vnd bezeugete öffentlich / dasz solches sein werck vnd geschefte nicht were / ja er hat mit grosser mühe sich beflissen / wans möglich were / desß armen volcks zuverschonen / wie Josephus / der selbst ein Jude gewesen / von ihm rühmet / Vnd Paulus Diaconus auch in seiner Histori von ihm bezeuget.

Lib. 5. c. 32

Paul. Dia.

lib. 9. c. 9.

G ij Bey

Bei dieser Statt verwüstung aber ist wenig mit-
leidens vnd verschonens / sondern dagegen spotten vnd
hohnlachen gespüret worden!

Was soll ich aber hier auff anders sagen: Als wie Christus
redet von den Galileern / Meinet ihr / Daß die Galileer / Mei-
net ihr / Daß die zu Jerusalem / Die zu Magdeburg
für allen andern sündler gewesen sind / weil sie das er-
litten haben? Ich sage nein / sondern so ihr euch nicht
bessert / werdet ihr alle auch also ombkommen. Vnd zwar
es ist ja Landkündig / daß vns vbrigen eben dergleichen / ja wol
viel ein härters getrewet ist / vnd noch täglich getrewet wird. D
solast vns doch busse thun / Damit der H & X. di nicht auch
vns / vnd alles das vnserige also in die Rappuse gebe / vnd von
dem erdboden vertilge. Last vns auch für vneinigkeithäten / ale
die wir sehen an Jerusalem vnd Magdeburg / was für jammer
erfolge / wann in einer Statt vneinigkeith vnd empörung ange-
richtet wird. Ja last vns tag vnd nacht Gott anrufen / daß er
vns vñ Jesu Christi willen vnser sünden verzeihen / würekliche
beständige busse verleihen / für feindlichem oberfall vnd für ver-
räterey vns behüten / vnser grosser schutz vnd heiliger schirm
seyn / heylsamem rath geben / vñ endliche hülff vnd rettung schaf-
fen wolle.

Luc. 13. 2.
Jer. 15. 13.
Amos 9. 8

III.

Vnd das ist der zweyte lohn vnd gewin / den man von fleisch-
licher sicherheit vnd verachtung Göttliches worts davon trägt.
Aber auch dieses alles ist noch gering zu schätzen / gegen dem
das nun folget / vnd welches der Dritte gewin der sicherheit zu
seyn pflaget / nemlich die verstoffung auß dem heiligtum /
vnd von der gnade Gottes: Dañ was thut Christus mehr
nachdem er vber Jerusalem geweinet vnd der selben ihren zeitli-

chen

ehen vndergang verkündiget hatte. Der text sagt: Er gieng in den tempel vnd sieng an aufzurreiben / die darinnen verkaufften vnd kauften. Das ist ein eigentlich sůrbild vnd anzeigung gewesen / d̄z alle die verächter Gottes vñ seines worts / wucherer / geizige / vñ die mit and̄n dergleich lastern den tempel Gottes verzureinigen / vñ sich nit bey zeit vñ von herze befehlen / auß dem allerheiligst̄ tempel Gottes / nemlich dem him̄el selbst / sollen außgeschossen werden. Wisset ihr nicht / spricht der Apostel / daß die vngerechten werden das reich Gottes nicht ererben. Lasset euch nicht verführen / weder die hurer / noch die abgöttischen / noch die ehebrecher / noch die wechlingen / noch die knaben schänder / noch die diebe / noch die geizigen / noch die trunckensbold / noch die lästlerer / noch die räuber / werden das reich Gottes ererben. Von solchem hab ich euch zuvor gesagt / spricht er anders wo / vnd sage euch noch zuvor / daß die solches thun / werden das reich Gottes nicht ererben. Drum prüfet / was da sey wolgefällig dem Herrn / vnd habe nicht gemeinschaft mit den vnfruchtbar̄en wercken der finsternuß / straffet sie aber viel mehr. Dann es wird nichts gemeines oder vnreines in das him̄elische Jerusalem vñ heiligthumb Gottes eingehen / sondern außgestossen werden in die finsternuß / da heulen vnd zänklappern seyn wird inmer vnd ewiglich. Vnd das wird erst wechthun / sinetmal jenes leben vnd herzigkeit im himmel weit weit höher zu achten ist / als alles / was in dieser welt hoch geachtet wird. Hinwiderumb jene qual vnd pein in der helle wird weit weit schrecklicher seyn / als alles leiden in dieser welt! O wie werden sich als dann die gottlosen so betrübt vmbsehen nach ihrem wuchertisch vnd wechselbank / nach ihrem sauff vnd spieltisch: aber es wird alles verlohren seyn! Der Herr wird sie von sich jagen. Die Teuffel vnd böse Geister werden sie mit hellischen fewrigen geistern zur helle treiben / da kein tröpflein wasser / kein tröpflein

1. Cor. 6.

9. 10.

Gal. 5. 21.

Eph 5. 10.

Apoc. 21.

27.

Matth. 22

13.

Apoc. 16.
10.

Hof. 10. 8.

Sap. 5. 6.

trostes / sondern eytel feyer vñ schwefel seyn wird. Darin sie für
schmerzen ihre zunge zerbeissen / vnd auß verzweiffelung ruffen
werden: O ihr berge bedeck et vns / vnd ihr hügel fallt vber vns.
Wir Narren haben des rechten weges gefehlet / wir haben eytel
vnrechte vnd schädliche wege gegangen / vnd haben gewandelt
wüste vnwege. Was hilfft vns nun der pracht? Was bringt
vns nun der Reichthumb sampt dem Hochmut? Es ist alles
dahin gefahren wie ein schatten / vnd wie ein geschrey das für
über fehret.

Die Gerechten aber werden alsdann mit freuden eingehen
in den himlischen tempel Gottes / vnd daselbst in vollkommener
fremde vnd herzlichkeit leben ewiglich.

Luc. 16.

Die / So in diesem leben das Bethaus Gottes verachtet / vnd
verunreiniget haben / werden dort auß dem hause des Vatters
aufgeschloffen vnd in das ewige klaghaus verstossen werden.
Die jenne / so allhier auß dem hause Gottes / ja auß ihrem eige-
nen hertzen / welches ein tempel des heiligen Geistes seyn sollte /
eine mördergrube gemacht / das ist / in has / neid / vnd andern la-
stern vnbusfertige gelebet haben / werden dort in die ewige hellis-
che mordgrube geworffen werden. Da hingegen die / so ihr frey-
de im Bethaus Gottes gesucht / vnd darinnen mit andacht Gott
gedienet haben / gehen werden in das himlische fremdenhaus zur
ewigen seligkeit / da sie mit Lazaro ewiglich geröstet / die gottlos-
sen aber im hellischen feyer mit dem reichen schlechter werden
ewiglich mit vnaussprechlicher quaal gepeiniget werden. Vnd
das ist der dritte gewin fleischlicher sicherheit.

2. Cor. 6.
1. 2.

So last vns doch / liebe Christen / vnser selbst bey zeiten war-
nehmen / vnd noch bedencken / was zu vnserm friede dies
net: Ja noch erkennen die zeit darin vns Gott genedig
heimsucht! Wir ermahnen euch als mithelfer / das ihr nie
vergeblich die gnade Gottes empfaht. Dann er spricht: Ich

habe

habe dich in der angenehmen zeit erhöret / vnd habe dir am tage
deß heils geholffen. Sehet / jetzt ist die angenehme zeit / jetzt ist
der tag deß heils. Heute / heute / So ihr deß HERRN stimme hö-
ret / so verstockt ewre hertzen nicht. O Land / land / land / Höre
deß HERRN wort! Umb so viel desto mehr / weil Gott noch ruf-
set / vnd vns noch ein wenig frist gibt.

Christus stehet gleichsam noch mit außgereckten Armen
vns zusamblen. Weh denen die solche genade verachten vnd
halsstarrig bleiben. Dann der HERR wird sie gewißlich straf-
ten / vnd wird kein errettung da seyn.

Vom Andern.

Wie sollen wir ihm dann thun / daß wir solcher
straffe vorkommen / vnd der zorn Gottes von vns
abgewendet werde? Das lehret vns Christus in dem
er den tempel zu Jerusalem reformiret vñ reiniget /
vnd darauß außtribet / die darinnen kauften vnd ver-
kauften. Es war so weit kommen zu Jerusalem mit vnord-
nung vnd sicherheit / daß nicht allein außserhalb / sondern auch
gar im tempel / Krämercy / wucher / vnd vngerechtigkeit getrie-
ben ward / Also / daß allbereit Krämerische vnd Wechselbän-
cke darin auffgerichtet waren / vnd die kauffer vnd verkauffer
ihre handthierung drinnen vbeten. Es hatte zwar alles einen fei-
nen schein / als obs zu mehrer bequemlichkeit der opffer angese-
hen were / damit die leut / sonderlich so frembde waren / das jeni-
ge / was sie nach dem geses opffern musten / also bald im tempel
bey der hand haben / vñ kauffen köndten: Aber es gerieth zu gros-
sem mißbrauch / betriegercy vnd vbervorthellung der leute / Al-
so / daß Christus sagt: Mein hauß ist ein bethauß / ihr
aber habts gemacht zur mördergruben / nemlich durch

ewren

Pfal. 95.

Jer. 22. 29.

Syr. 34. 25.

Matt. 21.

12.

Joh. 2. 15.

ewren wucher vnd betriegerey / Dardurch ihr die armen vmb das
 ihre bringt / dann wie Syrach sagt: Der arme hat nichts dann
 ein wenig Brots / wer ihn darumb bringt / der ist ein mörder.
 Darumb Christus auß Göttlichem eyffer Erslich solche vn-
 ordnung abschaffe / in dem er die Wechsele rüsch / vnd die stüle
 der Tauben krämmer / wie Mattheus meldet / vmb stößet: Vnd
 Wie Johannes weiter berichtet / ihnen das gelt verschüttet / vnd
 eine geissei macht auß stricken / vnd sie alle zum tempel hin auß
 treibet. Darnach aber vnd hingegen führet Christus das gu-
 te ein / in dem er täglich im tempel lehret / vnd also maniglich
 vnderichtet / was sie thun sollen / damit sie selig werden. Womit
 er dann genugsam den Juden gezeigt hat / wie sie es angreifen
 müssen / auff das sie der künfftigen straffe entgelen.

Nun die Juden haben solches nit geachtet / vnd haben ihren
 lohn schrecklich genug empfangen: Vns aber wil gebären / das
 wir diß exempel Christi besser in acht nehmen / vñ auch eine refor-
 mation durch abschaffung des bösen / vnd anrichtung des gu-
 ten vornemen. Worin dann das ihrige thun müssen / Erslich
 alle recht schaffene getreue lehrer vnd prediger. Die müssen den
 tempel Gottes rein halten / durch widerlegung falscher lehre / vnd
 behauptung der reinen Göttlichen warheit / vnd mächtig seyn
 zu straffen die widersprecher.

Esa. 58. 1.

2. Tim. 4.

2.

Esa. 56. 10

Ezech. 3. 18

Sie müssen aber auch mit Göttlichem eifer vnd ernst vmb-
 stossen die wucherbäncke / sauff: vnd spieltisch / das ist / solche vnd
 andere dergleichen laster / vnd alles ärgerliches leben müssen sie
 gebürlich auß Gottes wort straffen / getrost ruffen vnd nicht
 schonen. Ja anhalten / es sey zur rechter zeit oder zur vnzeit / das
 mit sie nicht als stumme hunde erfunden / vnd das blut der gott-
 losen von ihrer hand gefordert werde.

Weil aber der wenigste theil an wort straffe vnd warnung
 sich kehret / so sol auch die Obrigkeit an ihrem ort das beste thun /

damit

damit das böse abgeschafft vnd das gute eingeführet vñ gehand-
habet werde. Da muß ein rechtschaffenes Gideons / Ezechia vñ
Josia herr seyn. Vnd ist nicht genug das gute vnd heilsame
befehl gestellet vnd auß gefertiget werden / sondern / nach dem ex-
empel Christi / muß auch die geißel ernsthafter straffe zur hand-
genommen / vnd ein rechter Christlicher eiffer geobet seyn / damit
die Statt des H. Erren rein gehalten / vnd Gott nit verursacht
werde / einen mit dem andern zu straffen / dann verflucht ist der
das werck des H. Erren lässig thut.

Jer. 48. 10

Aber auch ein jeglicher hausvatter vnd hausmutter muß
in ihrem hause reformiren, alles gottlose wesen meiden / vnd sich
samt den ihrigen alles guten befließen / keine vnordnung wis-
sentlich dulden / sondern verschaffen / daß auch ihre heuser gleich-
samb tempel Gottes seyen / darinnen nit wucher vnd vngerech-
tigkeit oder ander schande vnd laster getrieben / sondern Gottes
furcht vñ erbarkeit gehandhabt / vnd fleißig gebetet werde. Wel-
cher gestalt der fromme Abraham die seinige angewiesen / vnd
also Gottselig hausgehalten hat / daß er auch von Gott selbst
deswegen sonderlich gerühmet wird.

Gen. 18.
19.

Ja es sol endlich ein jeder mensch sich selbst vnd seyn eigen
herr täglich reformiren. vnd durch Gottes hülf / fleißiges ge-
bet / vnd allerhand gute vbungen die böse affekten vnd begierden
des fleisches austreiben / vnd der wahren Gottseigkeit sich be-
fließen. Dann wisset ihr nicht / spricht Paulus / das ihr Gottes
tempel seyt / vnd der geist Gottes in euch wohnet? So jemand
den tempel Gottes verderbet / den wird Gott verderben: Dann
der tempel Gottes ist heilig / der seyt ihr. Darumb so waschet /
reiniget euch / spricht der H. Er / thut ewer böses wesen von mei-
nen augē / laßt ab vom bösen / lernet guts thun. Hasset das arge /
liebhet das gute. Tödtet ewer glieder die auff erden seind / harerey /
vnreinigkeit / schändliche brunst / böse lust / vnd den geis (welcher
ist abgötterey) vmb welcher willen kompt der zorn Gottes vber

1. Cor. 3.
16.
1. Cor. 6.
19.
Esai. 1. 16.
Psal. 34. 15
Amos 5.
15.
Ro. 12. 9.
Col. 3. 5.

H die

1. Cor. 5. 7
Eph. 4. 22

die Kinder des vnglaubens. Setzet den alten sawerteig auß/ auff
dass ihr ein neuer teig seyt. Leget von euch ab/ nach dem vorigen
wandel/ den alten menschen/ der durch lusten irret vñ sich ver-
derbet/ ernewert euch aber im geiste ewers gemüts/ vñ ziehet
den neuen menschen an/ der nach Gott geschaffen ist/ in recht-
schaffener gerechtigkeit vñ heiligkeit. Begebet aber auch hin-
fort nicht mehr der sünden ewre glieder zu waffen der vngerech-
tigkeit/ sondern begebet euch selbst Gott/ als die da auß den tod-
ten lebendig seind/ vñ ewre glieder Gott zu waffen der gerech-
tigkeit.

Rom. 6.
13.

Solche reformation vñ besserung vnserer selbstn würde
Gott wol gefallen/ vñ er würde auch seine straffe gnediglich
von vns abwenden/ dann so wir vns selbst richteten/ so würden
wir nicht vom Herren gerichtet.

1. Cor. II.
31.

Aber da findet sich ein harter knote vñ schwere hindernuß/
dadurch solche heilsame reformationes gemeiniglich gehindert
oder doch zurück getrieben vñ vernichtet werden/ daß denselben
nicht wird nach gesetzt. Dann wie gehet es Christo ober seiner
reformation? Im text stehet: Die hohepriester vñ schrift-
gelehrten vñ die fürnembsten im volck trachteten ihm
nach/ dz sie ihn vñbrächten. Das war der danck/ den man
Christo geben wolte für seine wolgemeinte reformation! Eben
den danck pflegt die welt noch heutigs tags denen zubeweisen/
welche beydes in lehr vñ leben besserung suchen/ vñ also die vor-
stehende straffen Gottes gerne abwenden/ vñ die gemeine wol-
fahrt befürdern wolten. Vñ dieser vñdanck verur sacht bey vie-
len eine nachlässigkeit. Da finden sich manche im stande der
Obrikeit/ vñ vnter weltlichen beampten/ welche vmb abwen-
dung der ärgernuß vñ handhabung des Gottesdiensts sich mit
viel bemühen: mögen sich vmb desselben willen nicht vnwerth
machen: Da man doch sonst/ wanns vmb das schnöde gelt zu

thun/

thun/ vnd dasselbe einzufordern ist/ keinen vndanck ansihet/ sondern die leute pfendet/ straffet/ vñ auff allerley weis dränget. Im Ehrstande finden sich bisweilen stumme hunde/ die nicht straffen/ damit sie nicht vndanck verdienen. Im haushstande fürchten sich oft die Eltern ihre söhnelein vnd töchterlein sawer anzusehen/ vnd zu straffen/ wie Eli/ vnd müssen hernach an ihnen herzleid erleben. Aber/ vnd wañ gleich bey so guter vnd heiliger lache noch so grosse gefahr vor auß stünde/ soll man sich davon gleichwol nit abschrecken lassen/ sondern ansehen **Erstlich** das exempel Christi/ wie auch anderer heiliger leute vnd eyfferer. Es wurde ja dem Herrn Christo selbst nach seinem leben getrachtet/ vnd das wußte er wol. Solte er drum nicht reformirt haben? Moses war ein geplagter mann vnd in mancher grosser gefahr/ stelte er dar umb das werck des Herren nachlässig gethan habene Würde nicht dem mann Gottes Eltz nach leib vnd leben getrachtet? danoch eyfferte er omb die ehre Gottes. Ich wil jetzt nit sagen von Jeremia/ Daniele/ Johanne dem täuffer/ Paulo/ Athanasio vnd andern: Ja auch von vnsern vorfahren/ von welchen bekand ist/ wie sie umb die warheit geeuffert/ vñ was für gefahr sie manchmal außgestanden. Darumb wir auch billich ebener massen ober der Göttlichen warheit/ vnd dann auch sonderlich ober der besserung des lebens rechtschaffen eyffern/ rechtmessige mittel gebürlich gebrauchen/ vnd das vberige Gott befehlen solten.

Esa. 56. 10

1. Sam. 3.

13.

In ansehung/ Fürs andere/ der Väterlichen vnd getreuen vorschung Gottes/ welche wir fernere auß vnserem text außgenscheinlich sehen. Dann/ Ob wol die fürnembste im volck Christo nachtrachteten/ so funden sie gleichwol nicht/ wie sie ihm thun solten/ dann alles volck hieng ihm an/ vnd höret ihn: Vnd das schickte Gott also/ weil Christi stunde

H ij noch

noch nicht kommen war. Gleicher gestalt nun / wann die welt schon noch so sehr wüetet vnd tobet wider die / so vmb die ehr Gottes eyffern / kan sie doch ohne Gottes willen ihnen nichts anhaben / noch ein härlein abnehmen. Ja sie finden nicht wie sie ihm thun sollen / Das ist / wie sie beykommen sollen den jenen / welche Gott beschützet / sondern da heist es mit ihnen : beschliesset einen rath / vnd es werde nichts drauß / beredet euch vnd es beschehe nicht. Ja / gesetzt / daß die gottlosen durch sonderliche verhengnuß Gottes endlich der frommen mächtig würden / massen dann Christus auch endlich selbst in seiner feinden hände kommen / vnd getödtet worden ist : so heist es doch / wie Christus anders wo sagt : Fürchtet euch nicht für denen die den leib tödten / vnd die seele nicht mögen tödten : Fürchtet euch aber viel mehr für dem / der leib vñ seel verderben mag in die helle. Dañ ob schon Christus dem leibe nach getödtet worden : ob schon auch noch viel glaubige gemartert vnd getödtet werden / dañoch ist Christus wider auferstanden vnd herrschet in ewigkeit : vnd die glaubige werden gleicher gestalt auch frölich auferstehen zur ewigen herrlichkeit / die Tyrannen vnd verfolger aber werden pein leiden / das ewige verderben / von dem angesichte des HERRen vnd von seiner herrlichen macht.

Eesai. 8. 10.

Matth. 10
28.2. Theß.
2. 9.2. Cor. 5.
13.

D / So laßt vns doch / vngeacht aller zeitlichen gefahr vñ vndancks / dz werck des HERRen fleißig thun / Das werck der reformation vnd besserung vnserer selbst frewdig angreifen / täglich / täglich fortsetzen / von vns selbst hinauß thun / was da böse ist / vnd hingegen das gute nach bestem vermögen pflanzen vnd befördern.

Die Obrigkeit thue im Regiment das ihre : Lehrer vnd Prediger in der Kirchen das ihre : Hausväter vnd Hausmütter dergleichen in ihren Haushaltungen : Ja auch ein jeder bey sich selbst in seinem eigenen hertzen / damit das böse vnd

gott

gottlose wesen verhindert vnd abgeschafft / vnd hingegen ein heiliges Gott wolgefälliges leben geführt werde. Also werden wir ein heiliger tempel Gottes heißen / vnd der Herr wird wohnung bey vns machen. Sollten aber gleich die gottlosen weltkinder vns darüber zusehen / vnd nachtrachten / so sollen wir vns dannoch trösten mit dem exempel Christi vnd vieler anderer heiligen / vnd daß auch an vns die feinde nicht finden werden wie sie ihm thun sollen. Recht wird doch recht bleiben / vnd dem werden alle fromme hertzen zusallen. Vnd ob sie gleich unserer mächtig würden / werden sie vns doch mehr nicht thun können / als vnsers himlischen Vatters wille ist : Ja ob sie vns auch gleich das zeitliche leben nemen / so bleibt vns doch das ewige. Wir haben ein gutes fröhliches gewissen / einen gnedigen Gott / vnd wissen / nachdem wir vns von hertzen gebessert haben / daß Jesus Christus nicht ober vns / wie ober Jerusalem weinen / sondern sich vielmehr vnserer erfreuen / auß allem jammer vns endlich erretten / vnd dermaleins mit sich führen wird in das himlische Jerusalem / in den neuen / allerheiligsten vnd ewigen tempel Gottes / da wir vns erfreuen werden mit vnaussprechlicher herrlicher freude / vñ ihu vnsern Heiland Jesum / sampdem Vatter vnd heiligen Geist preisen immer vnd ewiglich / Amen /

Psa. 94. 15

1. Pet. 1. 8.

Amen.



H iij Die

44.



Die Dritte Christliche

Gedencf: Predigt/ zu Gottes lob/ vnd

zur gedächtnuß des herrlichen / wunderbahren siegs/
welchen die Evangelische wider die Bapstliche Rottte durch
Gottes beystand nahe bey Leipzig / am 7. Septembris

ANNO 1631. innerhalb 4 1/2. stunden
erhalten /

Auß dem Lobgesang Deborah vnd Baraks / Judic. V.

yl. I. ad 23. Auß gnedige verordnung vnd befehl / am 18.
Septemb. in ansehnlicher volckreicher verlamblung
gehalten.

Eingang.

Als vor zeiten der Erhvatter Abraham einen
herrlichen sieg erlanget hatte / vnd von der schlacht
wider kam: sprach Melchisedeck der König von
Salem vnd priester des H. d. zu ihm: Geseg-
net seystu dem höchsten Gott / der himmel vnd erden
besitzt / vnd gelobet sey Gott der höchste / der deine feind-
de in deine hand beschlossen hat. Was damals Melchi-
sedeck vber dem sieg Abrahams gethan hat / eben dz gebüret auch
vns noch heute zu thun vber dem herrlichen wunderbaren / vnd
vnverhofften sieg / den der allmächtige gnedige Gott den Evan-
gelischen wider vnser grausame feinde am verschienenen 7.
tag Septembris innerhalb wenig stunden verliehen hat: Daß
wir nemlich Gott loben vnd dancken für solche seine mächtige

hülffe /

Gen. 14.
19.

hülffe/ vnd auch fernner mit herrlicher fürbitt / segnen vnd glück
wünschenden tapffern Helden/ welche Gott vns zu schutz erwe-
cket hat. Derwegen auch von vnserm regierenden lieben Lan-
des Fürsten vnd Herrn die Christliche gnedige verordnung ge-
schehen/ gleich wie wir bisher vnderchiedliche Buß: Bett: vñ
Fast tage gehalten / vnd den allerhöchsten Gott vmb hülffe in-
brünstig angeruffen haben/ D: wir auch also nun mehr / nach:
dem vns Gott so gnedig erhöret / vnd seine mächtige hülffe zu-
erweisen angefangen hat / ihme zu lob vñ ehren heute ein Danck:
fest halten / Gottes wunder vnd wolthat durch erklärunge eines
sonderbaren darzu verordneten texts / ausbreiten / seiner Gött-
lichen Allmacht für dieselbe dancken / vñ vmb fortsetzung der an-
gefangenen hülffe vnd vmb endliche erlösung anhalten.

Dannit dann solcher vnser Gottesdienst / danck sagung vnd
gebet Gott im himel gefällig sey / vnd zu vnser aller erbawung
vnd seligkeit gereichen möge / Wollen wir vns zuvorderst für
seiner hohen heiligen Majestät demütigen / vñ ihn vmb erleuch-
tung / gnade vnd krafft seines heiligen Geistes anruffen / mit
dem gebett / welches vns der Sohn Gottes Jesus Christus selbst
gelehret hat / Unser Vatter / etc.

Textus, Im buch der Richter am fünfften

Capitel 4. 1. ad 23.

Der sang Debora vnd Barak / der
sohn Abi Noham / zu der zeit / vnd sprachen:
Lobet den Herren / daß Israel wider frey
ist worden / vnd das volck willig darzu gewesen ist. Hö-
ret zu ihr Könige / vnd mercket auff ihr Fürsten / Ich
wil / dem Herren wil ich singen / dem Herren dem
Gott Israel wil ich spielen.

H E R R /

HERREN / da du von Seir auszogest / vñ einher gien-
gest vom felde Edom / da erzittert die erde / der himmel
truffe / vnd die wolcken troffen mit wasser. Die berge
ergossen sich für dem Herren / der Sinai für dem Her-
ren dem Gott Israel.

Zum zeiten Samgar des sohns Anath / zum zeiten
Jacl / waren vergangen die wege / vnd die da auff pfa-
den gehen solten / die wandelten durch krumme wege. Es
gebrach / an bawren gebrachs in Israel / bisz dasz ich
Debora auffkam / bisz ich auffkam / eine mutter in Is-
rael. Ein newes hat Gott erwahlet / er hat die thor be-
stritten / es war kein schilt noch spieß vnder vierzig tau-
sent in Israel zu sehen.

Mein hertz ist wol an den regenten Israel / die frey-
willig sind vnter dem volck. Lobet den Herren / die ihr
auff schönen eselin reitet / die ihr am gericht sitzt / vnd
singet / die ihr auff dem wege gehet. Da die schützen
schreyen zwischen den schöpffern / da sage man von der
gerechtigkeit des Herren / von der gerechtigkeit seiner
bawren in Israel. Da zoge des Herren volck herab zu
den thoren. Wol auff / wol auff Debora / wol auff / wol
auff / vnd singe ein liedlein / Mache dich auff Barak /
vnd fange deine fänger / du sohn Abi Noam. Da her-
scheten die verlassenen ober die mächtige leute. Der
Herr hat geherrscht durch mich ober die gewaltigen.

Auß

Auß Ephraim war ihre wurzel wider Amalek/
 vnd nach dir Ben Zamin in deinem volck. Von Ma-
 chir sind regenten kommen/ vnd von Sebulon sind re-
 girer worden durch die schreibfeder. Vnd Fürsten zu
 Isaschar waren mit Debora/ vnd Isaschar war wie
 Barak im grunde gesandt mit seinem fußvolck/ Ru-
 ben hielt hoch von ihm/ vñ sonderet sich von vns. War-
 umb bleibestu zwischen den hürten/ zu hören das ble-
 cken der herde/ vnd helest groß von dir/ vnd sonderst
 dich von vns? Gilead bleib jenseit dem Jordan/ vnd
 warumb wohnet Dan vnder den schiffen? Asur saß
 an der anfurt des meers/ vnd bleib in seinen zerrissenen
 flecken. Sebulons volck aber waget seine seele in den
 tod: Naphthali auch in der höhe des feldes.

Die Könige kamen vnd stritten/ da stritten die Kö-
 nige der Cananiter zu Thaanach/ am wasser Megid-
 do/ aber sie brachten keinen gewin davon. Vom him-
 mel ward wider sie gestritten/ die sterne in ihren läuff-
 ten stritten wider Sissera. Der bach Kison wälzet sie/
 der bach Kedumim/ der bach Kison: Tritt meine seele
 auff die starcken. Da rasselten der pferde füße für dem
 zagen ihrer mächtigen reuter.



Auflegung.

Psa. 64. 8.



Ehr eine tröstliche zuversicht fassete vnd
 bezeugete David vor zeiten wider seine feinde;
 da er sagt: **G**ott wird sie plötzlich schies-
 sen / das ihuen wehe thun wird. Alle
 menschen die es sehen / werden sagen /
 das hat Gott gethan / vnd mercken / das sein werck sey.
 Die gerechten werden sich des Herren frewen / vnd
 auff ihn trawen / vnd alle fromme hertzen werden sich
 des rühmen. Was allda David auff's zukünfftige sich ver-
 tröstet / das können wir / Gott lob vnd danck / vom vergangenem
 wider vnser hochmütige Tyrannische feinde heute rühmen.
 Gott hat sie plötzlich gestürzt / das ihuen wol recht wehe thut.
 Alle menschen / die es sehen oder hören / ja die feinde selbst müssen
 sagen / das hat Gott gethan / vnd mercken / das es sein werck sey.
 Des sollen wir vns billich frewen / Gott fernuer vertrauen / vnd
 alle fromme hertzen den Herren rühmen. Dann der Herr hat
 ein grosses an vns gethan / des seind wir frölich. Der Herr ist
 vnser macht / vnser psalm vnd vnser heil. Heute singet man mit
 freuden vom sieg in den hütten der gerechten: Die Rechte des
 Herren behelt den sieg: Die Rechte des Herren ist erhöht. Die
 Rechte des Herren behelt den sieg. Dann es ist eine alte lobliche
 gewonheit der Kinder Gottes / das sie / wann ihnen Gott eine
 sonderbare wolthat vnd hülff erzeiget hat / dem Herren zu ehren
 auch ein sonderliches Dancklied vnd Lobgesang gedichtet / vnd
 also Gott gepriesen haben. So theten Moses vnd die kinder
 Israel / nachdem Gott den Phrao im rothen meer erträncket
 sie aber mächtig errettet hatte. So theten die gottselige weiber
 als David den Goliath geschlagen / vnd die Israeliten auß der

Psa. 126. 3.

Psa. 118. 14.

Exod. 15. 1.

1. Sam. 18.

hand

hand der Philister errietet hatte. Die alte Teutsche im heiden-
thumb/wie Tacitus vnd Aventinus melden/ haben auch pfler-
gengefänge zu dichten / wann sie sonderbare thaten gethan vnd
sieg erlanget haben. Aber sie haben indenselben nur ihre Abgöt-
ter vnd sich selbst gelobet. Bus aber wil viel mehr gebühren / das
wir den allerhöchsten einigen vnd wahren Gott preisen. Danu
er ist/der den Königen sieg gibt/vñ erlöset seine knechte vnd dem
mörderischen schwert der bösen. Rosse werden zum streittage be-
reitet / der sieg aber kompt vom H. G. Dren. Darumb wir auch
hierbey in acht zu nehmen haben/was Paulus sagt: Seyt danck-
bar in allen dingen. Ja saget danck allezeit für alles G. D. vnd
dem Vatter im namen vnsern Herrn Jesu Christi. Zu welcher
danckbarkeit vnd lob G. D. vns dann mercklich auffmuntern
kan der jetzt verlesene Lobgesang Deborah vnd Baraks / darin sie
Gott preisen / ja andere zum lob G. D. anmahnen/wegen der
herlichen hülff / so Gott ihnen so wol newlich / als auch vor zeiten
ihren vättern erzeiget hatte: vnd darauff auch ihre brüder
loben / welche sich der gemeinen sache angenommen vnd ihnen zu
hülff kommen: Dargegen aber denen einen verweish thun/wel-
che sich abgefondert vnd sie verlassen hatten. Warauff sie dann
erzehlen / wie nichts desto weniger der allmächtige G. D. vom
himmel wider ihre feinde gestritten/sie aber mächtig erlöset habe.

Vnd werden wir also Gottes Allmacht vñ väterliche trew
hierauff erkennen / wie er den seinen auch in den allergroßesten
nöthen pflege vnd vermöge zu helffen / damit wir nimmermehr
an Gottes macht vnd güte in vnserm creuz verzagen / sondern
getrost seyen vnd seiner gnedigen hülffe mit gedult erwarten.

Wir werden auch hierauff abnehmen/wie billich vnd löblich
es sey/das man sich des volcks Gottes vnd der sache die zu Got-
tes ehre/der Kirchen vnd des vatterlands wolfsahrt vñ rettung
vnserer betrangten brüder gereichet / treulich ohne ansehung ei-
niger gefahr/annehme: Vñ hingegen wie vnrecht vnd verweish

Tacit. de
moribus
German.
Avent. l. 3.
Annal.

Psal. 144.
10.

Provc. 21.
31.

1. Theff. 5.
17.
Eph. 5. 20.

I.

II.

J ij lich

lich es sey / die brüder in der noth verlassen / vñ von gemeiner sache sich absondern.

III.

Sonderlich werden wir angenahmet vnd getrieben werden durch dis: exempel den allmächtigen GOTT / der allein wunder thut / von heizen zu preisen / vnd seiner fernern wolthaten vns zu versichern.

Wollen denmach zur erklärang schreiten / Vnd weil der text etwas lang ist / denselben zwar mit der erklärang durchgehen / aber geliebter kärke haben nur den besten kern darauß fassen / vñ lernen vns zu nutz machen: Anhörnde:

Erstlich / die vermahnung zum lobe Gottes / sampt der anstimmung vnd vrsachen desselben:

Zum andern / Den rühm deroen stämme / so der gemeinen sache bey gestanden / vnd den verwies gegen die so sich abgesondert.

Zum dritten / Die beschreibung des siegs der Israeliten / vnd wie es damit zugegangen.

Der allerhöchste Gott wirket durch seinen Geist in vns / daß wir hierdurch zur herrlichen danckbarkeit / kindlichem vertrauen gegen ihm / vnd zu rechtschaffener Gottes furcht erwecket werden / Amen.

Vom Ersten.

Wiewol nun auch den mitteln / durch welche Gott vns guts thut / ihr danck vnd lob gebüret / Jedoch so soll für allendingen dem allmächtigen Gott das schuldige danck vnd lobopffer gegeben werden. Welches dann in diesem Lobgesang mit fleiß in acht genossen worden.

worden. Darbey wir dann nach der ordnung des texts zu be-
weyßen haben / **Einnocht** / Wer diejenige seyen / die zum lob
Gottes vernahmen / vnd dasselbe anstimmen. Das ist **Debora**
vnd **Barak**. **Debora** das weib **Lapidoth** war eine gottselige
mutter / Prophetin vnd Richterin in **Israel** / welche auß Göt-
tlichem trieb den rath gab wider **Jabin** der **Cananitter** König vñ
desselben **Feldhauptman Sifferam** / so das volck **Israel** hefftig
bedrängeten zu streiten / vnd beruffte auch einen **feldhauptman**
ober **Israel** / welcher mit zehen tausent mann aufziehen vnd den
streit führen sollte. Ja sie raffte **Gott** fleißig an für das volck
Israel / wie **Josephus** meldet / vnd zwar auff des volcks begeren.
Wagte sich auch selbst mit ins feldt / vñ zog dem feind entgegen.

Wie es daß nichts vngewöhnliches ist / daß **Gott** auch etwa
durch schwache werckzeuge vnd durch weiber große vnd wun-
derbare thaten verrichtet: massen nicht nur von dieser **Debora** /
sondern auch von **Jael** / **Judith** / dem klugen weib zu **Theloa**
vnd zu **Abel** bekand ist.

Barack ein Sohn **Abinoam** war eben der / welchen die
Debora nach **Gottes** willen zum heerführer vnd **feldhauptman**
der **Israeliten** beruffen hatte / welcher auch nach ihrer anwei-
sung mit zehen tausent mann von den **Kindern Napthali** vnd
Sebulon wider **Sifferam** aufgezogen war.

Dieser **Feldhauptmann** nun stimmt zu der **Prophetin**
Debora / **Gott** zu loben ober ihrem herrlichen sieg. Dañ / zu der
zeit / sagt der text / nemblich / nach dem sie den sieg wider **Sisse-**
ram erlangt hatten / sang **Debora** vnd **Barack**. Vnd erinnert
Barack damit auch fürnehme häupter **Feldhern** vnd **Kriegs-**
leute / d; sie / nach dem sie etwa einen sieg erlangt / dem **Almäch-**
tigen Gott von herzen dafür danken / vñ sich nicht schämen den
Propheten vnd **Prophetinnen** / das ist / den heiligen gliedmassen

J iij Chri

I.

Judic. 4.
Josep. an-
tiq. libr. 5.
cap. 6.

Judic. 4.
Judith. 13.
2. Sam. 14
2. Sam. 20

Christi im lobe Gottes zuzustimmen / ja auch wol andere dazu auffzumuntern / vnd mit ihrem Gottseligen exempel vorzuleuchten / wie dann nicht nur allhier Barack / sondern auch sonst Moses / David / vnd andere tapffere helden gethan haben / dann auch sie freylich ohne Gottes beystand nichts vermögen / darumb sie auch dem Herrn / so wol als andere fleißig dafür zudancken haben! Vnd eben das ist der weg / daß auch ihnen Gott fern zeige sein heil.

II.

Wie stimmen aber Debora vnd Barack ihren lobgesang an? Erstlich vermahnen sie zum lobe Gottes / vnd ruffen mit freuden: **Lobet den Herren:** das ist dancket ihm für seine herrliche mächtige hülffe. Dann sie erkennen / daß kein ander Gott sey als der einige / vnd daß sie ihren sieg vnd rettung niemand anders als ihme zuzuschreiben haben. Darnach aber / damit sie in dem / wozu sie andere vermahnen / mit ihrem exempel selbst vorleuchten / heben sie den gesang an / vnd wollen daß meyniglich / ja auch Könige vnd Fürsten ihren zuhören vnd drauff mercken. Wie sie dann sagen: **Höret zu ihr Könige vñ mercket auff ihr Fürsten.** Vorauff dann: **Ich wil / dem Herren wil ich singen / dem Herren dem Gott Israel wil ich spielen** Ist eine theils abgebrochene theils gedoppelte rede / womit dann der eyffer vnd die begierde Gott zuloben angedeutet wird. Darumb sie auch nicht nur mit dem munde singen / sondern auch dem Herren zuehren spielen / vnd also auff allerley weise Gottes lob außbreiten vnd preisen wollen.

Ist demnach billich vnd recht / wann vns der liebe Gott sonderbare wolthat erzeiget / vnd auß grosser noth vns errettet hat / daß wir ihm als dann auch auff allerley weise gebürlich dancken / mit singen / mit seitenspiel vñ musicalischen instrumenten / doch ohne alle fleischliche vppigkeit. Freuet euch des Herrn jr gerechten / spricht David: Die frommen sollen ihn schon preisen

Psal 33.

mit

mit schalle. Dancket dem Herren mit harffen/ vñ lobsinget ihm auff dem psalter von zehen seiten. Singet ihm ein neues lied/ machets gut auff seiten spielen mit schalle.

Wan dann Debora vnd Barack so frölich singen vnd spielen wollen/ was haben sie doch für ursach darzu? Was macht sie so frewdig vnd danckbar? mit einem wort: Gottes wolthaten.

Dann da erzehlen sie erstlich eine gar frische hülffe Gottes/ das nemlich Israel wider frey ist worden/ vnd das volck willig darzu gewesen ist.

Israel ist wider frey worden/ sprechen sie/ vñ dancken also für die erlösung auß der hand ihrer feinde. Dann es hatte Jabin der Cananiter König das volck Israel / eine lange zeit/ nemlich zwanzig Jahr vnter schwere dienstbarkeit gezwungen / vnd sehr hart gedrückt. Nun aber waren sie durch ein sonderlich wunderwerk Gottes wider erlöset / in dem Sissera des Jabis Feldhauptmann durch einen schrecken von Gott in die flucht geschlagen: In solcher flucht aber in die hütte Jaels sich verflochen/ vnd als er auß müdigkeit geruhet hyme von Jael ein nagel durch seinen schlaff geschlagen worden/ das er gestorben/ vnd also die Cananitische macht zerstreuet/ das bedrangte volck Israel aber erlöset worden ist. Dis ist die grosse wolthat vnd hülffe Gottes/ dafür sie so frewdig dancken. Dis meinen sie/ da sie sagen: das Israel wider frey worden sey.

Aber auch für das mittel / welches Gott geschicket vnd regirt hatte/ dancken sie dem Herren/ singende: Lobet den Herren das das Volck willig darzu gewesen ist/ nemlich vns zu hülff zukommen / vnd der gemeinen sach sich anzunemen / welches dann von etlichen Stämmen / davon wir drunden hören werden zuverstehen ist. Vnd war freylich ein sonderlich werck vnd regierung Gottes / das selbige Stämme so willig gewesen

seyen

III

seyn dem Barack nachzufolgen vnd den Cananittern sich zu widersehen. Dann Barack hatte sonst keinen gewalt vber das Volck. Gott aber rühret inen das hertz/das sie willig darzu waren / jme sich zu vntergeben vnd in den streit sich führen zulassen. Diß erkennet nun Debora vnd Barack als ein sonderlich werck Gottes/rühmen es / vnd wollen das es auch von andern erkandt vnd gepriesen werde.

Gleichwie nun damals Gott sein Volck in der schweren dienstbarkeit/darin sie eine zeitlang gestocken/nicht allzeit gelassen/sondern wie in diesem text gerühmet wird/dasselbe wider frey gemacht/Ja an seinen feinden gerochen hat/also sollen wir der gewissen zuversicht zu Gott seyn/ob er schon seine glaubigen etwa schwerlich heimsucht/das er doch dieselbe nit ewiglich in vnruh lassen/sondern dermal eins vnd zu rechter zeit widerumb erretten/ja allen muthwillen der feinde gewaltiglich rechen werde.

Psal. 55. 23

Psal. 125. 3

Eesai. 9. 4.

Eesai. 14. 4

Psal. 81. 14.

Er wird das scepter der gottlosen nicht bleiben lassen vber dem häufflein der gerechten.

Es wird endlich heissen / das joch ihrer last / die ruthe ihrer schulder / vnd der stecke ihres treibers ist zerbrochen. Dañ man ein solch sprichwort führen wird: Wie ist's mit dem treiber so gott auß / vnd der zins hat ein ende! Der Herr hat die ruthe der gottlosen zerbrochen/die ruthe der herrscher. Welches alles so viel desto eher geschehen wird/je eher wir vns zu Gott bekehren. Dann also spricht der Herr selbst: Wolte mein Volck mir gehorsam seyn/vnd Israel auff meinen wegen gehen/so wolte ich ihre feinde bald dempffen / vnd meine hand vber ihre widerwertigen wend / vnd die den Herren hassen/müsten an ihm fehlen / ihre zeit aber würde ewiglich wehren. So last vns doch nicht kleinmütig werden / noch den muth fallen lassen in trübsal. Wir haben ja noch nit zwanzig/noch nit vierzig/viel weniger siebenzig Jahr/wie vorzeiten das volck Gottes/sondern nur etliche wenig Jahr

trang

tragsal gelitten. Wolten wir dann schon ungeduldig werden? Wolten wir schon murren vñ verzagen? Das sey ferne! last vns viel mehr busse thun/ vnd vnserm Gott in die ruthe fallen/ zu ihm vns kehren/ so wird er sich auch widerumb zu vns kehre/wie er versprochen hat. Vnd so ihr euch bessert/wie ihr habt angefangen/werden alle feinde geschlagen werden.

Wozu dann dem Herren gar leicht ist mittel zu verschaffen/ als welcher/wie wir fürs andere hiebeylernen/ der menschen hertzen in seiner hand hat/vnd dieselbe willig machen kan/vns zu hülf zukommen/vnd beystand zuleisten.

Dann warum danket Debora vnd Barack GOTT dem Herren dafür/ das das Volk willig gewesen ist zum freit/ als weil sie erkand vnd auch meinniglich zuverstehen geben wollen/ das der Herr allein der sey/ der des volck's herr also gelenket vnd willig gemacht habe. Wie dann ebener massen von dem Volck welches dem neuen König Saul nach gefolget/ gesagt wird/ das der Herr ihnen das hertz gerühret habe. Vnd zwar wie Gott zu weilen eine feind erweckt/ wie von Salamo gesagt wird/ Daz ihm der Herr einen widersacher erweckt habe. Also erwecket der Herr den seinen auch helffer vnd heilande/die sich preanehmen/ vnd durch Gottes beystand hüffe leisten/wie das Volk Israel solches in manchmahl vnd fürnemlich zu den zeiten der Richter in der that erfahren hat.

Ia blind/ vnd mehr als blind verstockt vnd vndanckbar werden wir/wann wir eben jetzt in diesen tagen nicht erkennen vnd danckbarlich rühmen wolten/das sonderbare grosswerck Gottes/ in dem er das hertz eines freunden mächtigen Potentaten vñ tayfferen helden/ nemlich Königlicher Majestet in Schweden/ vnd dero volck's der massen bewegt vnd erwecket hat/ Das derselbe vns armen betrangten Evangelischen in Teutschland von fernem zu hülf kommen/ vnd sich der Kirchen Gottes mit grosser gefahr vnd mühe angenommen hat. Wol mögen wir sagen:

R

Lobet

Pro. 21. 1.

Lobet den Herren / das solch volck willig zum streit gewesen ist! Herr das ist dein werck / der du des Königs hertz in deiner hand hast / vnd lenckest es wohin du wilt. Laß vns Gott bitten / das er mit seiner hülffe fortsetze / vnd doch auch aller anderer Evangelischen Stände hertzen erleuchten vñ regieren wolle / das sie die gefährliche vnd grausame Practicen der Abgöttischen erkennen / vnd sich des wercks des Herren rechtschaffen annehmen.

Num. 21.

In dem aber Debora vnd Barak diese frische wolthat Gottes anziehen vñ rühmen / dencken sie zurück / das Gott schon für alters dergleichen mehr wunderbare hülff vnd wolthaten erzeiget habe / vnd nicht nun erst anfangen genedig zu seyn. Deswegen beginnen sie auch etliche alte wolthaten zurühmen / nemlich erstlich wie sie Gott in der wüsten geführet zum gelobten lande / da sie von Seir außgezogen vñ vom felde Eddom einher gegangen / ja da der Herr selbst für ihnen hergezogen vnd sie geschüzet mit solcher macht / das die erde gezittert / der himmel getreuffelt / die wolcken mit wasser getroffen. Ja die berge vnd sonderlich der berg Sinai sich ergossen habe für dem Herrn dem Gott Israel / das ist / das alle volcker umbher erschrocken vnd sich entsetzt haben / sonderlich da schon der Amoritter König vnd Og von Basan sögeschlagen würden / das himmel vnd erden darob zittern mögen.

Judic. 3.

Darnach gedencen sie mit wenig worten auch des zustands des Volcks Israel zu den zeiten Samgar / da sie dann sehr hart von den Philistern gedrückt / aber auch herrlich widerumb seind erlöset worden durch Samgar den sohn Anath / welcher sechshundert Philister schlug mit einem ochsen stecken / vnd erlösete Israel. Solche alte wolthaten erholen sie zu dem end da mit sie sich selbst / vnd auch andere desto mehr zum lobe Gottes bewegen. Vñ wollen soviel sagen. Du / O barmherziger Gott / hast vnsern vhr groß Eltern vorzeiten wunderbarlich geholffert. Du hast vor wenig Jahren zur zeit Samgar dein Volck erlö-

set / du

set/ du hast noch gar newlich auch vns von vnsern mächtigen
grawfsamen feinden errettet: Emma/ du Gott hast die deinen
nit verlassen: Desz danken wir dir billich von ganzem herzen.

Vns/Gelichte im Herren/wird auch wol anstehen/das wir
beneben den frischen wolthaten Gottes/ auch dessen vns erinn-
ern / was der gnedige Gott so wol vnsern vor: Eltern als vns
von langer zeit her gutes gethan hat / damit wir nicht allein des-
sto mehr vnd herrlicher Gott loben/sondern auch in vnserm ver-
trauen auff Gott desto stärker werden / vnd auß so viel vorher-
gangenen herrlichen wolthaten die gewisse zuversicht fassen / der
Gott der bissher vns so viel guts gethan hat / werde auch künff-
tig sich gegen vns nicht vnbezeuget lassen/ sondern noch fernere
helffen vñ erretten: Allermassen auch Paulus geschlossen/nach-
dem Gott ihm vnd seine gefehrten in Asia auß so grosser trübsal
erlöset hette / hoffe er auff Gotter werde sie auch hinfort erlösen.

2. Cori. 1

Endlich kommet Debora vnd Barak widerumb auff die
newliche frische erlösung/ als welche sie sonderlich in diesem lob-
gesang preisen wolten / vnd damit selbige erlösung desto herrli-
cher erscheine / stellen sie für augenden grossen jammer / den sie
in die zwanzig Jahr vnder der Tyranney der Cananitter auß-
gestanden/ vnd auß welcher sie Gott erlöset hatte. Zu den zeiten
Jacl / sprechen sie / waren ersilich/ vergangen die wege vnd die
da anff pfaden gehen solten/ die wandelten durch krumme wege/
das ist / man hatte müssen auffhören zu reisen / vnd die offene
strassen zugebrauchen/ wer aber je zureisen hatte muste krumme
vmbwege vnd heimliche sechliche suchen / weil es ganz vnicher
auff den strassen war wegen der Cananitter / welche die Kinder
Israel vberall feindlich angrieffen / vñ die strassen vnicher
machten.

Darnach so gebraches auch! Spricht der tert. Woran
dann? An bawren gebrachs in Israel/oder an Dörffern/

K ij das ist/

das ist/die Dörffer waren wüß vnd leer/das arme bayers volck dorffte sich nicht sehen lassen / was feld blieb vngewet / vnd die nahrung lag ganz darnider wegen grosser unsicherheit vnd trauerey: **Bis ich auffkam / sprich Debora / eine mutter in Israel.** Das ist / solch elend wehrete so lang / bis ich endlich außsonderlichem trieb Gottes des arme volckes Israel vor eine mutter ihres Kindes mich angenommen / vnd diese herrliche hülfße von Gott erlanget habe.

Es verschweiget aber Debora auch die vrsach nicht / darumb Gott die Israeliten so hart habe heimgesucht. **Ernewes hat Gott erwahlet / er hat die thor besritten /** Eigentlich heisset: **Er nemblich Israel / hatte neue Götter erwahlet / darumb war streit urden thoren / vnd war kein schild noch spieß vnder vierzig tausent in Israel zusehen.** Andeutend / das Gott die Israeliten vmb ihrer abgötterey vnd sünde willen so hart gestrafft / vñ dermassen in irer feinde gewalt gegeben habe / dz fast in ganz Israel kein wehr noch waffen gelassen / sondern menniglich entwehret worden / das sie keinen widerstand thun können / sondern mit sich haben müssen vmbgehen lassen wie die tyrannen wolten: **Auch diesen jamer hat vns nun Gott erlöset / wil Debora vnd Barak sagen: Gott hat vns frey gemacht! Sollen wir ihm dafür nit dancken? Sollen wir nicht seinen namen preisen?**

Das ich anders hiebey geschweige / so bedenck it jezund nur das einige / nemlich wie artig vns hierin die blümlein vnd fruchte des krieges / wie auch die vrsach desselber beschrieben vnd vort augen gestellet werden.

Fruchte des kriegs seind: das die strassen im Lande vn sicher seind: das niemand sicher öffentlich reisen / vnd seinen ge

schafft

schefften nach gehen darff; daß freyheuter vnd strassenräuber die leute feindlich angreifen/berauben/verwunden/ ja wol gar dar-
 ander schlagen vnd tödten: deswege wanderleute allerley frum-
 me wege vnd heimliche schleiche suchen vnd gebrauchen müssen.

Früchte des Krieges seind/ daß dörffer vñ Stätte verwü-
 stet/ die arme leute auß dem ihrigen vertrieben/ vnd die wohnun-
 gen theil gelassen werden: daß der ackerbaw verhindert wird/ die
 nahrung darnider ligt/ vnd aller handel vnd wandel gesperret ist.
 Summa / daß eitel jammern vnd elend in lande ist/ vnd wie der
 heilige Geiſt solche verwüstung beschreibet / d; / wo vorhin herz-
 liche weinstöcke gestanden / nachmals dornen vnd hecken seyn/
 daß man mit pfeilen vnd bogen dahin gehen muß: Wo zuvor
 stätliche Pallast gewesen/ vnd leute gewohnet haben/ daß allda
 die Zihim vnd Ohim sich lagern / Straussen da wohnen / vnd
 die Feldgeister sich finden lassen. Daß Eulen in den Pallasten
 singen/ vnd Drachen in den Schloßern.

Vnd darbey pflegt es gemeiniglich / wann der krieg ober-
 hand nimpt/ nicht zu bleiben / sondern als dann liegt auch der
 Gottesdienst darnider: Die Policiey/ gute ordnungen vñ zucht
 wird hindan gesetzt: Die schulen vñ gute künste gehen zu grund:
 Aller barmhertzigkeit vnd billichkeit wird vergessen: Da schonet
 man weder der alten noch fracken leutt / noch auch der jungen
 vnmündigen Kindelein: Lose leute haben alldayhren freyen wil-
 len/ Erbare vnd fromme leute werden unterdrückt/ vnd vbel ge-
 handelt: Die Wittwen seuffzen: Arme waisen weinen/ es seuffz-
 het jederman. Vnd gleich wie der todt vnter allen schrecklichen
 dingen das schrecklichste ist/ Also ist der krieg vnter allen schädli-
 chen dingen das schädlichste / darumb auch die liebe Propheten/
 wann sie dem volck Gottes die straffe des kriegs angekündigt/
 gemeiniglich darbey ein hefftiges wehklagen geführt/ vnd ver-
 mahnet haben/ daß man weinen/ heulen/ vnd säcke anziehen sol-

Esa. 7. 23.

Esa. 13. 21.

Ezech. 14.
21.

le. Dañ es gedencet zwar Gott viererley plagen/welche er seine vier böse straffen nennet / Als schwerd / das ist krieg / hunger / böse thier / vnd pestilenz. Welche traum alle böß genug seyn / aber doch ist der krieg die aller ärgste / auch darumb / weil er die andern plagen alle nach sich zeucht vnd verursacht.

Eraf. in a-
dag. ex A-
ristot. &
Plin.

Dann / wo der krieg oberhand nimpt / da bleibt hungers noth / pestilenz / vnd böse thier nicht aussen. Ja wie der wind Cacias die wolcken zusammen zeucht zum ungewitter / Also bringt der krieg alles unglück vnd verderben.

Esaia 3. 9.

Vnd ich meine ja / Wir haben eben das in vnserm Batterland bissher mit grossen schaden vnd herleid in der that erfahren! Ist nicht eine lange zeit vn sicher gewesen zu reisen? Wie mancher ist beraubet / geplündert / geschlagen / Ja wol gar getödtet worden? Wie oft haben die armen leute auß den Dörffern von dem jhren lauffen / vnd sich hie vnd da verkriechen müssen? Wie ist an vielen orten der ackerbaw gehindert / vnd die ganze nahrung gesperret worden? Seind nicht auch den armen leuten ihre wehr vnd waffen genommen worden / daß sie sich weder haben können noch dürffen wehren / sondern mußten die Landtsverderber mit sich ihres gefallens vmbgehen lassen. Vnd wer kan den schaden gnugsam außrechnen / welcher vergangene Jahr hero vnserem lieben Batterland zugefüget worden? Solches alles nun kompt her von vnserer sünde / damit / damit bringen wir vns in alles unglück. Dann / O wie schrecklich haben wir vns an Gott versündigt / wie schändlich sind wir von seinen gebotten vñ rechten abgewiechen / daß nicht wunder were / wann vns Gott noch härter heimsuchte. Ja wunder ist es / daß Gott so lang gedult gehabt vnd vnser verschonet hat. Nun sehen wir vnd merckens / welch eine edele gabe der friede sey! Nun verstehen wir / was es sey / wann der Herz seine hand abzeucht. So last vns demnach desto herrlicher Gott dancken / daß er vns zu helffen angefangen hat / vnd einen blick sehen las-

sen vns

sen unserer erlösung. Laß vns aber auch mit der buße ernstlich
vnd fleißig fortfahren / vñ den HERRN vnnachlässig anrufen/
daß er das gute werck so er angefangen / gnediglich vollenden/
vnd vns von unsern grausamen blutdürstigen feinden endlich
erlösen wolle. Lasset vns mit der Kirche Gottes herzlich beten/
daß der HERR beschezen vnd stärken wolle das volck vnd die
leute / die er ihu festiglich erwehlet / vnd vns zu schutz erwecket
hat / vnd damit wir der mahl eins mit gänglicher freude GOTT
loben / vnd für endliche erlösung mit Debora vnd Barack dan-
cken mögen.

Psa. 80. 18

Deren freude dann so groß gewesen / daß sie auch andere
zum lobe Gottes gereizet vnd angemahnet haben / vnd zwar al-
lerley Stände.

IV.

Zuersten die Obristen vnd Hauptleute im kriege / von
welchen Debora sagt: Mein hertz ist wol an den Regenten
Israel / die freywillig seind vnder dem volck / das ist / die
sich so gutwillig der gemeinen sache angenommen / vnd zum streit
haben gebrauchen lassen. Mein hertz ist wol an ihnen / das ist /
ich habe das vertrauen zu ihnen / sie / als welche dem streit selbst
beygewohnet vnd die mächtige hülffe Gottes gesehen haben /
werden auch desto eyffriger vnd williger seyn den Allmächtigen
Gott mit mir zu loben.

Zum andern redet sie auch an die Obrigkeit vnd Richter im
Lande Israel / vñ spricht: Lobet den HERRN die ihr auff
schönen Eseln reitet / das ist / Ihr Fürsten in Israel / welche
also zu reiten pflegten / wie anders wo in der schrift zu sehen ist.
Ja lobet den HERRN die Ihr am gerichte sitzen / vnd also
recht vnd gerechtigkeit hand zu haben vnd Gottes ehre zubesor-
dern schuldig seyt.

Judic. 10.
4. & c. 12.
v. 4.

Zum dritten ermahnet sie auch das gemeine volck / vñ spricht:

Singet/

Singet / das ist / lobet Gott die ihr auff dem wege gehet / das ist / die ihr ewer er nahrung vnd handtierung nach gehet / vñ euch selberlich nachren müßet. Ja auch ihr knechte vnd mägde / welches wasser holen / vnd andere dergleichen hausdiensete leisten müßent lobet den HERRN / vnd an denen orten **DAZUOR** die schützer schrien zwischen den Schöpffern / das ist / da zu vor die kriegsleute mit grossen geschrey tyrannisirten bey den wasserbronnen / Also das niemand sicher dahin kömen konte / wasser zu schöpfen / **DA** sage man **JEHT** von der gerechtigkeit des HERRN / das ist / von seiner gerechten hülfte wider die feinde. Ja man sage **VOR** der gerechtigkeit seiner bawrn in Israel / oder wie es eigentlich heist von den gerechten thaten des HERRN gegen seine Dörffer in Israel / die nemlich der HERR frey gemacht hat / das sie widerumb bewohnet werden können. Dann nun / nachdem nemlich solche erlösung geschehen / **ZUG** / oder stung wider an zuziehen **DAS** volck des HERRN zu den thoren / das ist / zu den ordentlichen gerichtē / welche vorzeiten in den thoren gehalten würden / all da ihre sachen zu handeln / vnd das recht zu erlangen / welches zu vor ganz dā in der lag. Für solche wolthaten nun soll männiglich / wes stands er sey / dem HERRN danken vnd lob singen. Ist demnach in alle wege billich / das so wol kriegsleute als andere / so wol Obrikeiten als vnderthanen / reich als arme / ja auch knechte vnd dienstbotten dem allerhöchsten Gott für seine thaten vnd mit namen für den lieben Frieden / waur er vns denselben verleihet / lob vnd danck sagen. Dann des selben ja männiglich genießet / seiner nahrung nachgehen / vñ auch das liebe wasser mit Frieden schöpfen kan / welches man ehmal zu kriegzeiten nit ohne gefahr / wie gering es auch ist / geschöpfen kan / wie vnser text allhie andeutet.

So man aber auch dafür **G**ott dancken soll / wann man

zu den

zu den Irdischen Wasserbrunnen sicher gehen von schöpfen darff/
wie vielmehr vñ inbrünstiger hat man Gott als dan zu danken/
wann man frey öffentlich vnd sicher zu den brunnen Israels / dz
ist / zum gehör göttlichen worts gehen / vñ mit rühe auß dem sel-
ben / trost / vnterricht / vnd vernahmung schöpfend darff! Was
das für ein kleiner vñ herrliche gabe Gottes sey / hat David wol
verstanden / darumb er auch hin vnd wider soherzlich darnach
geseuffzet vñ darumb gebetet hat. Für diese wolthat haben auch
wir noch zur zeit vrsach dem lieben Gott fleissig zu danken / a-
ber auch zu bitten / das er sein wort bey vns fermer erhalten wol-
le / als welches vnsers hertzens freude vnd trost ist.

Pfal. 27. 4.
Pfal. 42. 5.

Jer. 15. 16

Endlich muntert Debora sich selbst vnd den Barak auff
frölich zuseyn / vnd den Herren zu loben. **Wolauff / wolauff**
Debora / spricht sie / Wolauff / wolauff / vnd singe ein
liedlein. Gleich wie auch etwa David sich selbst zum lob Gottes
annahmet. Zu Barack aber spricht sie: **Mache dich auff**
Barack / vnd fange deine fänger du sohn Abinoam.
Das ist / diejenige / welche vns gefangen hielten / die führe du nun
gefangen / vnd mache einen triumph auß ihnen / zu ehren dem
allmächtigen Gott / der sie vns in vnser hande gegeben hat.
Dann nun herrschen die verlassene über die mächtige
leute. Der Herr hat geherichtet durch mich über die
gewaltigen. Das ist / Nun mehr hat sich durch Gottes hülffe
das blat gewendet / das wir / die wir arme verlassene leute wa-
ren / vnserer mächtigen feinde meister worden seind / Ja durch
mich schwaches werckzeug / in dem nemlich Gott mich erhöret /
hat er vns die herrschafft gegeben über die starke helden / vnd vn-
sere grausame feinde. Alles hat der Herr gethan / demedanz
cken wir! **Deme zu ehren trinnphiren wir.**

Pfal. 57. 9.
Pfal. 103. 1
Pfal. 104. 1
Pfal. 105. 1

So ist demnach auch noch erlaubt / das tapffere Kriegs-

1

helden

helden nach erlangtem sieg triumphiren / vnd ihre fänger gefangen führen. Nur allein / daß sie Gott die ehre geben / mit es ihnen selbst oder ihren vermögen zu zuschreiben / sondern auch sagen mit Debora / **Der Herr hat durch mich geherrschet vber die gewaltigen.** Ihm allein gebürt die ehre / dann er ist auch / der den Königen sieg gibt / vnd erlöset sein volck vom inderischen schwerd der bösen. Darumb auch David Gott die ehre gibt / vnd spricht: Gelobet sey der Herr mein hort / der meine hand lehret streiten / vnd meine fäuste kriegen. Ja ich dancke dem Herren von ganzem herzen / vnd erzehle alle deine wunder. Ich frewe mich / vnd bin frölich in dir / vnd lobe deinen namen / du Allerhöchster / Daß du meine feinde hinter sich getrieben hast / Sie sind gefallen vnd umbkamen für mir. Denn du führtest mein Recht vnd sache auß / du sitzt auff dem stul ein rechter Richter.

Psal. 44. 10

Ibid. v. 1.

Psal. 9. 1.

Vom Andern.

Miso haben sie dem allerhöchsten Gott / wie billich das erste lob vnd den vorzug gegeben / Wor auff sie nun fürs andere / auch die iunige auß ihren brüdern vnd Stämmen Isract rühmen / welche ihnen in dem streitt zu hülff kommen sind: Hingegen aber verweisen sie es denen / die sich der gemeinen sache entschlagen / vnd von ihnen abgesondert hatten.

Sie rühmen fürs Erste den Stamm Ephraim / vnd sagen: **Auß Ephraim war ihre Wurzel wider Amaleck.** Welches etliche also verstehen / daß das land Ephraims bis an das gebirge der Amalekiter / vnd gleichsam vonden an die wurzel ihres gebirges / das ist hart an ihre grenzen gestossen habe / Derowegen solche treu der Ephraimiten desto rühmlicher were / daß

sie von

sie ungeacht der gefahr / so ihnen von ihren bösen nachbarn den Amalekittern vnter des zustehen könte / gleichwol ihren brüdern zu hülff kommen seind. Andere legens anders auß. Doch gehet alles dahin / das Ephraim außdrücklich / vnd vor allen andern seiner treu haben gerühmet wird. Nach ihm wird auch gelobet der stam Benjamin. Fürs dritte Machir / das ist / ein theil des stamns Manasse. Dann Machir der erste geborne sohn Manassio war. Von dem / spricht der text / sind Regenten kommen / das ist / fürnchme Officiere / so zum krieg dientlich gewesen seyn. Zum vierdten wird gedacht des stamns Sebulon / von welchem kommen seyn Registerer durch die schreibfeder / das ist / gelehrte vnd geschickte leute / die durch ihr schreiben auch andere herzu gezogen / vnd mehr hülff zu wegen gebracht haben.

Zum fünfften wird auch gerühmet Maschar / auß welchem Stamm Fürsten vnd fußvolck Debora vnd Barack zu hülff kommen waren.

Endlich wird auch gedacht des stamns Naphtali. Von diesen allen wird zu ihrem ewigen ruhme gezeuget / das sie der gemeinen sache des volcks Gottes sich treulich vnd eyfferig angenommen / vnd keine gefahr geschewet habene

Voraus wir sehen / Wie löblich vnd billich es sey / das brüder / Landolente vnd Religions verwandten in gemeiner noth einander bey springen vnd helfen. Die jetzt erklärte histori / hat sich vngesehr vor zwey tausent / neun hundert vñ siebenzig Jahren zugetragen / vnd wird noch auff den heutigen tag / vnd in dieser stunde gerühmet ! Vnd zwar / es sagt ja Paulus / Nehmet euch der heiligen notturfft an. Welches auch alsdann in acht zu nehmen / wann die heiligen Gottes / vnd die Christlichen Gemeinen vnbillich von abgöttischen Tyrannen beträngt vnd verfolget werden.

Nicht zwar hats die meinung / das man sich vnbillicher weise gegen ordentliche Obrigkeit aufflehne vñ rebellire. Aber auch

hinwiderumb / Ist für keine Rebellion zuhalten / Wann die/
 denen Gott das schwerd auch gegeben hat / die Jhrige / nachdem
 sie kein recht vnd schutz erlangen können / wider den muthwillen/
 rauberey / schandthaten / vnd freventlichen gewalt vnbefugter
 Landsverderber gebürlich vertheidigen / Ja auch sich anderer
 ihrer nothleidender Brüder vnd religions verwandten treulich
 annehmen / welches alles die hochberümpfte / alte / redliche / vnd
 tapffere Teutschen / vor Jahren wol bedacht / derentwegen sie /
 Als man Anno 1529. mit fleiß darauff ombgieng / eine tren-
 nung vnter den Evangelischen anzurichten / ernstlich darwider
 protestireten / vñ keines wegs darzu haben verstahe wöllen. Dan-
 nen her auch die Evangelische den namen der Protestirenden
 empfangen haben. Vnd als im Jahr 1537. zu Smalkalden
 durch Heldum Keyserlichen Abgesandten / bey Chur: Sach-
 sen vnd Landgraff Philipsen hochlöblicher gedächtnuß / hefftig
 vnd listig gesucht wurde / daß eine trennung der Evangelischen
 geschehen möchte / Ist ihm männlich vnd getrost geantwortet
 worden von den Evangelischen: Si qua vis intenterur, non se-
 posse vel federis, vel etiam doctrinæ locios in ea necessitate
 deserere: Wann einige gewalt angelegt würde / köndten sie kei-
 nen mitgenossen ihres Bundes / oder ihrer Lehre / in solcher noth
 verlassen. Vnd solches hat auch der weiland Hochlöblichste /
 vnd dem Teutschen Reich getreue Keyser Maximilianus er-
 kand / vnd ihm gefallen lassen / Darumb als etliche Evangeli-
 sche selbst auß blindfeindlichem eyffer bey demselben ansuchten /
 daß einer vnd der ander Evangelischer vom frieden außgesetzt
 würde / hat er sehr wol vnd weißlich geantwortet: Was? soll ich
 zu euch sagen / wie Christus dort sagte: Nescitis, quid petatis,
 Ihr wisset nit / was ihr bittet. Wollet ihr euch selbst trennen?
 Sintemal er wol verstünde / Wann die Evangelischen sich
 trennen ließen / daß als dann leichtlich einer nach dem andern
 vnd sie also zu letzt alle köndten auffgerieben werden.

Sleid. 1. 6.

Sleid. 1. 11.

Weil dann selbiger löblicher Keyser nicht eine herrschafft
 ober die gewissen suchte / als welcher selbst bekand hat: Nullum
 gravius peccatum esse, quàm conscientis dominari velle. Es
 sey keine grössere sünde / als ober die gewissen herrschen / vnd die
 selbige zwingen wollen: Sondern suchte seines Reichs vnd an-
 befohlener vnderthanē wolvari trewlich vñ von herten: Als hat
 er nit allein in die thöricht gesuchte trennung der Evangelischen
 nicht willigen / sondern dieselbe viel mehr dafür warnen wollen.
 Welches heutiges tages / leider / nicht geschichet: Da hingegen
 die hochschädliche trennung / mit alleinder Evangelischen Häu-
 pter / sondern auch der Stände von ihren angebornen Herrn
 vnd Fürsten zum vorthail der Papisten mit grossem fleiß vnd
 list gesucht / vnd leider / bißher zu gemeinem schaden des Vat-
 terlands / viel zu viel bey manchen ist erhalten worden / vnd noch
 mit ohne grossen schimpff vnd nachtheil deren selbst / so sich be-
 thören lassen / vnterhalten wird.

Solte demnach billich jederman ein exempel nemen / an dē ge-
 trewen Ständen in Israel / welche es nit mit den feinden / sondern
 mit ihren brüdern gehalten / vnd derselben sich redlich angenom-
 men haben. Also solte billich heutigs tages niemand vnter den
 Evangelischen mit den verderbern vnseres Vatterlands / als mit
 öffentliche feinden des Reichs / welches sie verwüsten: der Leut-
 schen freyheit / als welche sie vnder das Joch zubringen gedenz-
 tken / ja als mit Erbsfeinden der Christlichen Evangelischen Res-
 ligion / die sie zuwertilgen sich verschworen haben: sondern viel-
 mehr mit den betrangten Bekennern des Evangelii es trew-
 lich vnd redlich halten / alles wagen / vnd Gott vertrauen / der
 vnge zweiffelt zuversicht / Gott werde seine herzlichkeit vollend
 erweisen / vnd seine Kirch erzetten / Sie aber werden dessen für
 Gott ein frölich gewissen / für redlichen menschen / vnd der Po-
 steritet einen vnsierblichen ruhm haben / Da hingegen andere in
 ihr vntrewes hertz sich schemen / vnd der rache Gottes / welche

Apo. 18. 4

den vntrewen nimmermehr außbleibet / gewertig seyn müssen.
Solche demnach niemand mit der Babilonischen Hun / son
dern gehet auß von ihr / daß ihr nicht theilhaftig werdet ihrer
sünde / auff daß ihr nicht etwas empfabet von ihrer plage. Vnd
wie schändlich es denjenigen nachklüge / welche es mit den sein
den des volcks Gottes halten / vnd die gemeine sache verlassen /
vernehmen wir nun fermer auß vnserm text.

Dann / Fürs andere / verweisen Debora vnd Barack
etlichen stämmen in Israel / daß sie sich abgesondert / vnd ihre
brüder verlassen haben.

Der erste ist Ruben / von welchem zweyerley geklagt wird.
Erstlich / daß er hoch von sich gehalten / vñ sich abgesondert / das
ist / sich für allen andern stämmen gar klug vnd für sichig ge
düncket hat / vnd grosse anschlüge in seinem herken gehabt: Als
welcher ohne zweiffel ihm eingebildet / durch solche absonderung
sonderbare gnade bey dem König der Cananiter / welcher biß da
her ober sie geherzschet / zu erlangen / vnd sicher zu bleiben. Kan
auch wol seyn / daß Ruben an die andere stämme etwa warnungs
vnd abmahnung schreiben abgeben lassen / daß sie sich dem Kö
nig der Cananiter nit widersetzen solten. Darnach wird fer
ner geklagt / Daß Ruben zwischen den Hürten geblieben
sey / zu hören das blecken der herde. Das ist / Daß er sei
nes guts geschonet / vñ vmb desselben willen seine betrangte brü
der / In die ganze gemeine sache des volcks Gottes / lieber verlas
sen / als etwas drüber wagen wollen / Der doch hernach / da die
sache wol außgeschlagen / so wol als andere / des glücks mit ge
niessen wollen / wie ihrer noch viel heutiges tages gesinnet seyn.

Zum andern wird geklagt vber Gilead / das ist / den halben
stamm Manasse / der von Gilead Manassis sohn herkommen war /
daß er jenseit dem Jordan geblieben / vnd nicht herüber kommen
sey / seinen brüdern wider Sisseram zu helfen / vermeinend / weil

er den

er den Jordan gleichsam zum schusz habe / werde er sicher bleiben / vnd habe nichts nach seiner brüder trangsals vnd vntergang zu fragen.

Zum dritten wird geklagt ober Dan / Das er vnter den schiffen gewohnet oder blieben / das ist / in seiner wohnung am meer still gefessen / vñ auch seiner brüder noch nicht zu herzen genommen / viel weniger aber ihn geholffen habe.

Endlich sagt der text von Aser: Auch derselbe sey gefessen / nemlich müßig / an der anfurt des meers / vnd sey geblieben in seinen zeruffenen Dörffern / oder in seinen zeruffenen Felsen / das ist / er hat sich gehalten in seinen steinklippen / vnd vmb den schaden seiner brüder sich wenig bekümmert.

Also haben diese Stämme mit einander schlechte ehr eingelegt / vñ wenig ruhm erlangt. Welche aber gleichwol ohne zweifel ihre scheinbare Politische vrsachen vnd entschuldigungen werden gehabt / vnd vorzumenden gewußt haben. Vnd ist kein zweiffel / das noch heutigs tages / vnd eben jetzt vnder von den jezigen / welche die gemeine sache der Evangelischen auch verlassen / vnd sich absondern / keine einige entschuldigung fürbraucht / oder so schön geschmückt werden könne / dergleichen nit von obgedachten Stämmen damals auch gebraucht könne worden seyn. Müßt aber alles nichts / sondern wird inen zum ewigen schimpff vnd nachtheil noch in dieser stunde nachgesagt / das sie ihre brüder verlassen / vnd von der gemeinen sache sich abgesondert haben.

Nicht weniger schimpfflich ist zu jeden zeiten denen / welche die gememe sache des volcks Gottes auch verlassen : zwar zum theil einen guten aufgang gerne sehen / aber nichts / ja vberall nichts dabey wagen / vñ zusehen / ja viel lieber noch inen fort den verfolgern beypflichten / vñ die so Gott vertrauen / vñ der guten sache sich herzlich annehmen / verlassen / als auch etwas wagen vnd durch Gottes hülf mit ehr vnd ruhm der grausamen seelen tyranney entgegen wollen. Da doch nichts gewissers ist / wann

die ver-

die verfolger vberhand behalten / das solche leute endlich ihren gewöhnlichen danck bekommen / das ist / entweder abfallen / oder doch alles verlassen vñ davon gehen müssen. Was hielten sie dan gewonnen? Ich wil zehund nicht sagen von denen / die ihre brüder in gemeiner noth nicht allein verlassen / sondern auch dieselbe gar zu vndertrücken mehr als andere sich bemühen! Dis ist den Abgöttischen wol ein lieblich vnd gewünschtes spiel / welches sie durch ihre liebe getreue bisdaher am fleißigsten practiciret.

Est. 4. 13.

Aber denen allen halten wir billich vor / was dort Mardoschai der Escher sagen ließ: Bedencke nit / das du dein leben errettest / weil du im hause des Königs bist für allen Juden. Dan wo du wirst zu dieser zeit schweigen / so wird eine hülfte vnd errettung auß einem andern ort den Juden entstehen / vnd du vnd deines vatters haus werdet vmbkommen.

1. Sam. 14.

7.

2. Chr. 14.

v. 11.

Das beste aber / das wir hieby zu vnserm trost zubehalten haben / ist das / Ob schon die glaubige auch etwa von ihren brüdern / landsleuten / glaubens genossen / oder sonst nahen verwandten verlassen werden / Gott der Herr gleichwol ihnen vermögen vñ pflege zu helfen / wie damals dem volck Gottes geschehen ist / deswegen auch Debora vnd Barak diesen lobgesang Gott zu ehren gesungen haben. Also sollen wir nun nit zweiffeln / wo wir mit herztlicher bus / vnd glaubigem inbrünstigem gebett vnernachlässig werden anhalten / der Herr werde / wie er angefangen hat / also auch fermer gewislich helfen / solte auch nur zween / ja nur ein stamm getrew bleiben / vnd sich der gerechten sache annemen. Dann es gilt ja Gott gleich zuhelffend durch viel oder wenig / oder auch da gar keine krafft ist. Vnd zwar wir sehen ja außgenscheinlich / das Gottes hand mit im werck hat / vnd noch wunder thut / wie er vorzeiten gethan hat.

Vom

Vom Dritten.

Dann höret nun fürs dritte vnd letzte / Wie es vorzeiten zugangen / daß das volck Israel obgesieget hat / vnd von der gewalder feinds errettet worden ist. Groß war diemache der Cananiter / Dann die Könige kamen vnd stritten / spricht der text / Da stritten die Könige der Cananiter zu Chanah am wasser Megiddo / Sie gebrauchten ihre macht / vnd lieffen sehen ihre grosse heers krafte: Aber sie brachten keinen gewin davö / spricht Debora vnd Barack. Wie das? Wer hat ihnen den widerstand gethan? Antwort / Vom himmel ward wider sie gestritten / die sterne in ihren läufften stritten wider Sisseram. Das ist / Es haben nicht allein menschen wider sie gestritten / sondern Gott selbst / welcher vom himmel durch den lauff seiner sterne / die er lencket / wie er wil / grausames vngewitter mit plazregen / wind vnd hagel / wie Josephus meldet / erwecket / dermassen / daß der bach Kison vnd Kedunim sich gleichsam gewalzet / das ist / ergossen hat / vnd die feinde zum hefftigsten erschreckt / vnd in die flucht getrieben worden seyn. Welches dann ein schrecken vom Herrn war / wie die schrift außtrücklich meldet. Vorüber Debora vnd Barack dermassen frolocken / Daß sie ihnen selbst zusprechen / vnd sagen: **Tritt meine seele auff die starcken.** Als sprechen sie: Vnötig ist / daß wir streiten / vnd vns bemühen. Der allmächtige Gott / der rechte Kriegsfürst selbst / hat unsere feinde dermassen zerfchlagen / daß wir sie nun mit füssen tretten mögen: Ja die starcken / die vns zuvor gleichsam vnder die füsse getretten hatten. Vnd wie stolzen sie doch! Welch ein angst vnd schrecken kam sie an!

Judic. 4.
v. 15.
Pla. 83. 10

M

Barack

Daraffelten der pferdefüsse für dem zagen ihrer mächtigen reuter. Oder/wie es auch kan verteuſchet werden/ Die pferde zerſtieffen ihre füsse von dem rennen ihrer reuter/ die nemlich in der flucht davon ritten / vnd ihr leben gern erzetet hetten.

Also weiß der allmächtige Gott die Tyrannen vnd feinde seines volcks endlich zuſtürzen/ vnd hingegen seine liebe glaubigen mächtig zuerretten. Were schon keine hülff auff erden / so sendet er doch hülff vom himmel.

Platzregen / wind vnd hagel müssen den feind schrecken. Ja ferner/hagel/ſchnee/dampff /vnd ſturmwinde müssen sein wort außrichten. Summa/es muß ihm alles dienē. Also ließ der Herr einen grossen hagel vom himmel fallen auff die heiden zur zeit Josua / vnd die sonn vnd der mond mußte still stehen biß sich das volck an seinen feinden rechte.

Zur zeit Samuels ließ der Herr donnern einen grossen donner ober die Philister vnd schreckt sie/dasß sie für Israel geschlagen wurden. Vnder dem heidnischen Keyser Marco Antonino war ein fählein Kriegsvolck / welches lauter Christen waren/ auff deren gebett Gott ein starck wetter kömten ließ/dasß sie zwar/sampt dem gansen Kriegsvolck Antonini erquickt würden/ vnd ihren lang gelittenen durst leschen kondten / die feinde aber mit donner vnd hagel geschlagen vnd abgetrieben wurden.

Wodurch der Keiser Antoninus bewogen worden/ſolches an den Rath zu Rom zuſchreiben/vnd denselben zuvermahnen/dasß man die Christen nit mehr verfolgte. Concedamus talibus inquit, ut sint Christiani, ne qua tela ejus generis contra nos petant & impetrent. Laß vns solchen leuten/spricht er / zugebē/dasß sie Christen seyen / damit sie nicht dergleichen pfeile auch etwa wider vns bitten vnd erlangen. Als Theodosius wider das mächtige Kriegsvolck Eugenu vnd Arbogastis streitten solte/betete er herzlich zu Gott / also dasß seine thronen auff die erde stie-

len / wort

Capitol.
Tertull.
Euseb.

len / worauff Gott einen starcken grawsamen wind wider die feinde erwecket / welcher nicht nur die pfeile Theodosii vnd seines kriegsvolck's desto stärker auff die feinde getrieben / sondern auch der feinde selbst eigene pfeil zurück / vnd in sie selbst geführet hat.

Also daß auch der heidnische Poet Claudianus solch wunder der rühmen / vnd demselben hat zeugnuß geben müssen / von Theodosio schreibend:

*O nimium dilecte Deo, cui militat ether,
Et conjurati veniunt ad classica venti.*

O du allerliebster Gottes / für den auch die lufft streittet / vñ die winde als geschworne knechte zuhülff kommen müssen!

Aber / Was sage ich viel von den alten Wunderwerken? Es hat ja nunder Allmächtige barmhertzige Gott / erst vor kurzem tagen eben ein solch groß herlich Werck bewiesen / bey den Evangelischen / gegen dero grawsame verfolger vnd feinde / in dem er der Königlichen Majest. in Schweden / vnd Churfürstl. Durchl. zu Sachsen in verschiedenem 7. tag Septemb. innerhalb wenig stunden bey Leipzig / einen so herlichen vnd wunderbaren sieg verliehen / dergleichen in hundert vnd mehr Jahren nicht gehört worden. Dann / Nachdem hochgedachte Königl. Majest. in Schweden / vñ Churf. Durchl. zu Sachsen sich zu höchstnötiger / vñ durch die vnaußhörliche schimpffliche Beträngnuß der hochlöblichen Evangelischen gebornen Reichsfürsten vnd Stände abgerungener Defension vnd Rettung conjungiret, Ist darauff mittwochen den 7. tag Septemb. vor Leipzig das scharmuckiren mit dem feinde angangen / bis sie gegen zwey vhr nach mittag mit aller macht an einander gesehet / Da dann anfangs der sieg allem ansehen nach sich auff des feindes seite gelegt / der auch den wind zu einem vorthail gehabt / daß es an seiten der Evangelischen zimlich hart gehalten / vnd gefährlich geschienen.

Weshwegen auch der fromme König von seinem pferde gestie

M ij gen/

gen/ auff die erde nider gefallen/ vnd gantz beweglich zu Gott geruffen/ Weil er sampt seinem volck zu wenig sey/ diesen mächtigen feinden zu wider stehen/ das doch Gott seiner Kirchen sich erbarmen/ vnd mit seiner genedigen hülffe erscheinen wölle.

Hat darauff seinem volck zugesprochen/ vnd mutig in den feind gesetzt: Da dann der wind sich gegen den feind gewendet/ vnd desselben macht plötzlich zerstreuet/ vber die acht tausent todt geblieben/ vnd in der flucht auch noch etliche tausent nidergeschlagen worden seind. So seind auch alle des feindes geschütze vnd Pack aschi dahinden geblieben/ vnd bey die hundert Fahnen vnd Cornetshnen abgenommen.

Ist auch darauff das ganze lager des feindes/ wie es in seiner herrlichkeit gestanden/ eingenommen/ vnd außgeplündert worden. Vnd ist also der grosse hochmut des feindes/ der sich für vnüberwindlich geachtet hat/ gestürket worden. Das wir wol sagen mögen: Ist das der Mann/ der die welt zittern/ vnd das Reich beben machete? Ja/ Welcher so manchen fürnehmen Reichsfürsten beschimpffet/ Ja auch wol vnderthanen von ihren Herren abzuwenden sich vnterfangen dorffte! Dem Allerhöchsten Gott sey danck für diese seine hülffe/ dadurch er bewiesen/ das er dannoch noch Richter auff erden sey. Darumb wir wol sagen mögen: Der HERR ist der rechte Kriegsmann: HERR/ wer ist dir gleich vnter den göttern? Wer ist dir gleich/ der so mächtig/ heilig/ schrecklich/ löblich vnd wunderthätig sey. Wann menschen wider dich wüten/ so legstu ehre ein/ vnd wann sie noch mehr wüten/ bistu auch noch gerüst. Man singet mit freuden vom sieg in den hütten der gerechten: Die Rechte des HERREN behelt den sieg/ Die Rechte des HERREN ist erhöhet/ Die Rechte des HERREN behelt den sieg. Der HERR hat großes an vns gethan/ des feind wir frölich.

Ihr sehet auß dem allem/ liebe Christen/ was das gebet vermöge/ wann es ernstlich ist! Ihr sehet auch/ das Gott ja noch so

grosse

Esa. 14. 16

Pfal. 58.

Exod. 15.

yl. 3. & 11.

Pfal. 76. 11

Pfal. 118. 15

Pfal. 126. 3.

grosse wunder thut / als er vorzeiten gethan hat. Wo seind jetzt die gottlose spötter / vnd Atheissen / die da sagen: es sey nit mehr vmb die zeit / das Gott wunder thue / wie vorzeiten sollen geschehen seyn? Ich meine ja / Gott hat eine zeitlang bisher wunder genug gethan! Vnd das ich nur von diesem leßten sage: Wer hat den frembden vnd so weit entlegenen König den bedrangten Evangelischen zu gut erwecket? Wer hat sein herz gelencket / so weit entlegenen völkern zu hülff zukommen? Wer hat die mit ihm verbunden / die desselben hülff zu vor nicht gesucht hattent? Wer hat den wind gewendet? Wer hat den bisher sieghafften feind also erschrocken vnd flüchtig gemacht? Wer hat den Evangelischen / welche vür ein guts schwächer warē als ihr feind / einen so geschwinden / wunderbaren / vnd vnerhofften sieg gegeben? Das hat allein Gott gethan. Dessen name sey gelobet in ewigkeit. Dann er ifs / der den Königen sieg gibet / vnd erlöset seine knechte vom mörderischen schwert der bösen.

Last vns / Liebe Christen / Gott dancken / von herken büß thun / vnd fortfahren fleissig zubeten. Nit last vns nach der weltweise vnser freude mit sauffen vnd vppigkeit bezeugen / dann das ist nit eine freude / die Gott gefelt / sondern da heist es: **Danckestu also de Herren deinem Gott / du doll vnd thörichte volck?** Das rechte danckopffer / das Gott gefelt / wird seyn das innigliche lob seines namens / eine herrliche beständige vuse / vnd dann ein fleissiges vnnachlässiges gebett. Darumb wir vns wol einbilden sollen die schöne wort Josakims des hohenpriesters / der da spricht: **Ihr solt ja wissen / dz der Herr ewer gebet erhören wird / so ihr nit ablasset mit fasten vnd beten vor dem Herren.** Gedenckt an Mosen / den diener des Herren / der nit mit dem schwert / sondern mit heiligem gebett den Amaleck schlug / der sich auff seine macht vñ krafft / auff sein heer /

Pfal. 144.
v. 10.

Deut. 32.
v. 6.

Judith. 4.

schild / wagen vnd reuter verließ. So soll es auch gehen allen
 feinden Israel / so ihr euch also bessere / wie ihr angefangen
 habt. Die gefahr ist noch nit gar vorüber / das wetter kan
 sich noch wunderlich vmbher wenden. Anhalten müssen wir der
 halben mit buß / gebett vnd vorsichtigkeit. Des glücks nit miß-
 brauchen / noch sicher werden: sonderu vns demütigen vnd Gott
 fürchten. Werden wir diß thun / so wird der Herr fortfahren /
 seine wunder zu zeigen / er wird der gottlosen zane gar zer schmet-
 tern / vns aber fermer zeigen sein heil. Vnd vns endlich erlösen
 von allem obel / vnd außhelffen zu seinem himlischen Reich.

Ihme / dem Allerhöchsten Gott / vnd vnserm einigem Not-
 helffer / dem Vatter / Sohn / vnd heiligen Geist / sey preiß vnd
 ehre in alle ewigkeit / Amen.

Dancksagung vnd gebett.

D Allerhöchster Gott / barmherzi-
 ger gütiger Vatter / du Allmächtiger starker
 Nothhelffer / Demmach du vnser gebett vnd seuffzen
 so gnediglich erhöret / vnd vns nun mehr einen erwün-
 schten sieg verliehen / vnd den hochmut der feinde ge-
 stürzet hast / so sagen wir dir / **D** HERR / für solche
 deine wunderbare / gnedige vnd allmächtige hülffe von
 grund vnserer hertzen lob vnd danck.

Exod. 15.

Pfal. 144.

HERR Zebaoth / Du bist vnser stärke / dich wol-
 len wir preisen. Du bist der rechte Kriegermann. Wer
 ist dir gleich / der so mächtig / heilig / schrecklich / löblich
 vnd wunderthätig sey? Gelobet seystu / Herr vnser
 hert / der du deinem volck sieg gibst / vnd erlösest deine

knechte

knechte vom mörderischen schwerd der bösen! Auff
 dich/ Herz/ trawet unsere seele/ vnd vnter dem schatten
 deiner flügel haben wir zuflucht / Du sendest hülfße
 vom himmel/ vnd hilffst vns von der schmach vnserß
 versenckers. Vnser hertz ist bereit / Gott / vnser hertz ist
 bereit/ daß wir dir dancken vnd dich loben. Erhöre vns
 doch fermer / O allergütigster Vatter / du starcker
 Nothelffer. Deine hand schütze das volck deiner rech-
 ten / vnd die leute / die du vns zu schutz erwecket hast.
 Gib vnsern feinden noch fermer einen Meister/ daß sie
 erkennen/ dz sie menschen seyn/ Laß sie mit ihrer macht
 du schanden werden / Gib ihnen ein erschrocken vñ ver-
 zagt hertz. Schlage sie nider mit dem schwerd/ deren/
 die dich lieben / daß dich loben vnd preisen alle die dei-
 nen Namen kenn:n.

Pfal. 57.

Pfal. 86.

Pfal. 9.
r. Macc. 4.

So wollen wir von dir nit weichen / sondern dir ein
 freudenopffer thun/ vnd deinem Namen/ HERR/ all-
 zeit dancken / daß er so tröstlich ist. Verleihe du nur
 vns allen/ durch die krafft deines H. Geistes/ eine hertz-
 liche buß / beständigen glauben / vnd recht danckbare
 hertzen / damit wir hinfort dir dienen in heiligkeit vnd
 gerechtigkeit / vñ du also vns fermer zeigen mögest dein
 heil / ja endlich von allen feinden vollkömlich erlösest/
 vnd zu dir nimmest in dein ewiges Reich/ durch Jesum
 Christum deinen Sohn/ Amen.

Pfal. 80.

Pfal. 54.

Q 27 4181

fol. 80

fol. 81

fol. 82

fol. 83

Handwritten text in a medieval Gothic script, likely Latin or German, arranged in columns. The text is mostly illegible due to fading and bleed-through from the reverse side of the page.

1077

me



ULB Halle

3

004 825 373





Herr
 fen/ G
 Nidda/2
 Kräyfe
 vnd her
 David
 ne gerie
 ober vn
 das er
 sucht vñ
 Es ist vñ
 Go
 außgef
 Evang
 Gott a

nen Für
 ffen zu Ges
 Ziegenham vnd
 n in den Keimischen
 GENERALN, &c.
 n/te.
 hus zuvor.
 och geborner
 / Groß sind die
 achtet/ der hat ei
 tet/ das ist löblich
 ewiglich/ spricht
 echt/ vnd alle sei
 f bisher gewesen
 zelische Kirchen/
 llen hart heimgel
 müssen: Herz
 hast/ Psal. 119. 71.
 s/ das nach lang
 ie hochlöblichste
 de/ als welchen
 Obriqkeiten ge
 A ij setz

